

駢體文鈔

冊一



駢體文鈔

百集雜歌

四部備要

集部

上海中華書局據康刻譚

校本校刊

桐鄉

陸費逵總勘

杭縣

高時顯輯校

杭縣

吳汝霖校
丁輔之監造

昔史臣述堯啓四言之始孔子贊易兆偶辭之端此上古之元音載道之華辭不徒以文言也及左氏傳曲臺記戰國之文百家之書莫不特引其緒至枚乘司馬長卿出而其體大備有書之昭明詩之諷諫禮之博物左之華腴故其文典其音和盛世之文也後生祖述際齊梁而益工玄黃錯采丹青昭爛可謂美矣然不能有古人之意其蕩者爲之或跌宕靡麗浮而無實放而不收至蕭氏父子而其流斯極然其間如任昉沈約邱遲徐陵庾信之徒爲之莫不淵淵乎文有其質焉惜也囿于俗而不能進厥體故君子有自檜之譏焉以至于今作者代興互有工巧世莫能尙揆其文善江鮑者豔厥體善徐庾者侈厥文旣其華不旣其質習其流不探其源不可謂之善學者矣辨志書塾錄駢儷之文區其條爲三上焉者制作之文中焉者冠冕之制下焉者則齊梁之篇爲多而古人喻志之作入焉錄自秦始皇迄于隋幾以端其塗徑道其門戶而已夫人受天地之中資五氣之和

駢體文鈔上編

卷一

秦嶧山刻石 泰山刻石 瑯琊臺刻石 之罘立石 刻碣石門

會稽刻石

後漢班孟堅高祖泗水亭碑銘 十八侯銘 封燕然山銘

蔡伯喈光武濟陽宮碑

魏曹子建制命宗聖侯孔羨奉家祀碑 承露盤銘

梁陸佐公新刻漏銘 石闕銘

北魏溫鵬舉寒陵山寺碑

北齊王子淵上庸公陸騰勒功碑

隋薛元卿老氏碑

以上銘刻

卷二

漢揚子雲趙充國頌

後漢史孝山出師表

班孟堅竇車騎北伐頌

晉摯仲洽太康頌

潘正叔釋奠頌

宋鮑明遠河清頌

梁簡文帝大法頌
南郊頌
馬寶頌

北魏高伯恭北伐頌

隋許務本神雀頌

薛元卿隋高祖頌

以上頌

卷二

漢王子淵聖主得賢臣頌

司馬長卿封禪文

揚子雲劇秦美新

後漢班孟堅典引

張平子東巡誥

魏邯鄲子禮魏受命述

漢司馬長卿難蜀父老

王子淵四子講德論

終軍白麟奇木對

宋顏延年三月三日曲水詩序

王元長三月三日曲水詩序

梁沈休文梁武帝集序

梁元帝職貢圖序

隋李公輔霸朝集序

以上雜颺頌

卷四

漢揚子雲十二州箴十二首 百官箴十六首

後漢崔亭伯官箴三首

魏嵇叔夜太師箴

晉潘正叔乘輿箴

張茂先女史箴

摯仲洽尚書令箴

張夢陽劍閣銘

北齊王子淵皇太子箴

以上箴

卷五

漢揚子雲元后誄

魏曹子建文帝誄

平陽懿公主誄

後漢蘇孝山和帝誄

晉潘安仁世祖武皇帝誄

皇女誄

左九嬪萬年公主誄

晉成帝哀策

王恂晉武帝哀策

宋謝希逸宋孝武帝哀策文
宋孝武宣貴妃誄
皇太子妃哀策

陳文

齊王仲寶高帝哀策文

江文通齊太祖誄

謝元暉齊敬皇后哀策文

梁王元禮昭明太子哀策文

陳沈初明陳武帝哀策文

以上謚誄哀策

卷六

漢景帝後六年令二千石修職詔

漢武帝元朔元年議不舉孝廉者罪詔 元狩二年報李廣詔

後漢光武帝報臧宮馬武詔

明帝申明科禁詔

章帝建初七年禘祭詔 元和二年詔三公 元和二年祠明堂詔

和帝永元十二年恤民詔

鄧太后延平元年察吏勅

蜀漢後主策丞相諸葛亮詔

魏明帝賜彭城王據璽書

宋文帝元嘉二十六年駕幸丹徒詔

宋孝武帝孝建元年詔 大明七年告岳詔 大明七年校獵歷陽

詔

宋明帝泰始三年禁采供不時詔

梁武帝設謗木肺石二函詔 罷鳳凰御書詔

梁元帝次建業詔

陳後主勸農詔 太建十四年詔 追封吳明徹詔

隋高祖報李穆詔 賜高麗王湯璽書

以上詔書

卷七

漢武帝元狩六年封齊王策 封燕王策 封廣陵王策

漢宣帝神爵三年丞相初拜策 五鳳二年御史大夫初拜策 元

壽二年丞相遣郡國計吏勅 御史大夫遣郡國計吏勅

後漢陳孔璋爲袁紹王烏丸版文

潘元茂冊魏公九錫文

梁徐孝穆陳公九錫文

魏禪晉策

齊禪梁策

以上策命

卷八

蜀漢先主成都即位告天文

齊高祖即位告天文

漢匡稚圭禱高祖孝文武廟文
告祭毀廟文

後漢蔡伯喈遷都告廟文

齊謝元暉祭大雷何周二神文

江文通蕭太傅東耕祝文

盧子行遼陽山寺願文

隋煬帝寶臺經藏願文

以上告祭

卷九

漢王子贛敕掾功曹教

魏文帝以鄭稱爲武德侯傅令

曹子建黃初六年下國中令

宋傅季友爲宋公修張良廟教

齊江文通建平王聘隱逸教

梁任彥昇宣德皇后令

蕭彥達爲荊州刺史下教

邱希範永嘉郡教

陸佐公至潯陽郡教

梁武帝禁奢令

梁簡文帝與劉孝儀令

與湘東王論王規令

移市教

罷雍州

恩教 與僧正教

梁元帝課耕令

周文帝下朝士令

以上教令

卷十

漢鼂錯對賢良文學策

公孫弘對賢良文學策

晉摯仲治賢良對策

卻廣基賢良對策

齊王元長永明九年策秀才文五首 永明十一年策秀才文五首

梁任彥昇天監三年策秀才文三首

北齊樊孝謙升中紀號對 求才審官對 釋道教對 刑罰寬猛

對 禍福報應對

以上策對

卷十一

秦李斯上秦王書

漢賈山至言

枚叔上書諫吳王

鄒陽上書吳王

司馬長卿上書諫獵

王子陽諫昌邑王疏

劉子政上災異封事

匡穉圭上政治得失疏

揚子雲諫不受單于朝書

後漢劉毅論鄧太后註紀疏

劉子奇上桓帝書

黃世英移疾疏

蜀漢諸葛孔明出師表

魏高堂升平諫明帝疏

晉張士然爲吳令謝詢求爲諸孫置守塚人表

宋傅季友爲宋公求加贈劉前軍表 爲宋公至洛陽謁五陵表

謝希逸上封禪儀註奏 求賢表

齊蕭子良言臺使表 出啓武帝 諫斂塘役錢啓 上武帝請贈

豫章王嶷啓

孔德璋上新定法律表

任彥昇爲范始興作求立太宰碑表

梁簡文帝上昭明太子集別傳表

沈休文上宋書表

北魏蕭智亮考績表

邢子才請置學及修立明堂奏

隋柳彧請禁絕百姓作角觝戲奏

牛里仁請開獻書之路表

李士恢上隋高祖革文華書

以上奏事

卷十二

漢吾邱子贛難禁民挾弓弩

侯應罷邊備議

後漢蔡伯喈伐鮮卑議

孔文舉肉刑議

魏夏侯太初時事議

荀公會省官議

晉摯仲洽駁用古尺 祀皋陶議

潘安仁上客舍議

宋何承天尹嘉罪議

齊王仲寶南郡王冠議

諒闇親奉烝嘗議

以上駁議

卷十三

晉阮嗣宗為鄭冲勸晉王牋

劉越石勸進表

梁任彥昇百辟勸進今上牋

沈初明勸進梁元帝第二表

勸進梁元帝第三表

徐孝穆勸進元帝表

以上勸進

卷十四

後漢蔡伯喈上始加元服與羣臣上壽表

魏曹子建慶文帝受禪表

宋鮑明遠征北世子誕育上表

梁沈休文賀齊明帝登祚章

齊江文通爲建平王慶明帝疾和表
爲蕭公上銅鐘芝草衆瑞表

爲建平王慶少帝登祚表
慶王太后正位章

北周庾子山賀平鄴都表
賀新樂表
爲齊王進赤雀表
爲晉

陽公進玉律秤尺斗升表

盧子行爲百官賀甘露表

以上賀慶

卷十五

後漢陳忠薦周興疏

孔文舉薦謝該上書
薦禰衡表

蜀漢秦子勅奏薦儒士任定祖

晉陸士衡與趙王倫薦戴淵啓

桓元子薦譙元彥表

劉柳薦周續之

陸休猷薦朱萬嗣表

梁任彥昇爲蕭揚州作薦士表

以上薦達

卷十六

漢鄒陽獄中上書自明

中山靖王聞樂對

魏曹子建求自試表

求通親親表

陳審舉表

上責躬詩表

晉羊叔子讓開府表

李令伯陳情表

陸士衡謝平原內史表

庾元規讓中書令表

殷仲文解尚書表

宋鮑明遠侍郎報滿辭閣疏

齊王仲寶請解僕射表

王元長求自試表

謝元暉拜中軍記室辭隋王牋

任彥昇爲齊明帝讓宣城郡公表 爲范尚書讓吏部封侯第一表

爲褚諮議纂讓代兄襲封表

江文通詣建平王上書 爲蕭太傅謝追贈祖父表 爲蕭公謝開

府辟召表 爲蕭公三讓揚州表 爲蕭驃騎讓太尉增封第二

表 爲蕭公讓九錫第二表

梁袁千里謝武帝啓表

陶宏景解官表

王僧孺奉府牋 爲韋雍州致仕表

沈初明爲陳太傅讓表

北周庾子山爲閩將軍乞致仕表

陳江總持爲陳六宮謝章 爲陳六宮謝表

以上陳謝

卷十七

漢司馬長卿喻巴蜀檄

後漢陳孔璋爲袁紹檄豫州 檄吳將校部曲

魏鍾士季檄蜀

魏魏伯起爲東魏檄梁文

齊江文通討沈攸之尙書符

漢王子淵移金馬碧雞

劉子駿移太常博士

後漢竇周公讓隗囂書

梁簡文帝答穰城求和移文

北周庾子山又移齊河陽執事文

以上檄移

卷十八

漢王子贛刻匡衡張譚

陽方正奏罷鴻都文學

鍾元常上漢獻帝自劾書

晉劉大連劾周筵劉允李匡奏

齊任彥昇彈蕭穎達疏 奏彈曹景宗 奏彈劉整

宗元饒劾陳衷奏

梁沈休文奏彈王源

劉士章彈賈執傅湛文

以上彈劾

右著錄若干首皆廟堂之製奏進之篇垂諸典章播諸金石者也夫拜颺殿陛敷頌功德同體對越表裏詩書義必嚴以閔氣必厚以愉然後緯以精微之思奮以瑰爍之辭故高而不櫛華而不縟雄而不矜逶迤而不靡馬班已降知者蓋希或猥瑣鋪敘以爲平通或詰屈彫琢以爲奇麗朴卽不文華卽無實未有能振之者也至於詔令章奏固亦無取儷詞而古人爲之未嘗不沉詳整靜茂美淵懿詞詞深厚實見于斯豈得以唐宋末流澆劫浮尪兼病其本哉故亦略存大凡使源流可知耳

駢體文鈔中編

卷十九

漢司馬子長報任安書

王生與蓋寬饒書

鄭朋奏記蕭望之

後漢馮敬通奏記鄧禹

朱叔元爲幽州牧與彭寵書

臧子源報陳琳書

王仲宣爲劉荊州與袁譚書

魏阮元瑜爲曹公作書與孫權

孫子荆爲石仲苞與孫皓

吳薛敬文與諸葛恪書

晉伏文表與阮籍書

阮嗣宗答伏羲書 奏記詣蔣公

呂仲悌與嵇茂齊書

劉越石答盧湛書

宋周義利報羊希書

珍做宋版印

齊張延符與尚書令王儉書

梁邱希範與陳伯之書

簡文帝與湘東王論文書

王僧孺與何炯書

陸韓卿與沈約書

徐孝穆與王僧辯書
在北齊與楊僕射書
為貞陽侯重與王太

尉書

陳霸先答貞陽侯書

徐孝穆報尹義尚書

尹義尚與徐僕射書

朱瑒與徐陵請王琳首書

以上書

卷二十

漢賈生過秦論

後漢班叔皮王命論

李蕭遠運命論

魏曹元首六代論

晉阮嗣宗達莊論

嵇康養生論

陸士衡五等論

潘正叔安生論

于令升晉紀總論

宋何承天安邊論

梁劉孝標辨命論
廣絕交論

北齊盧子行勞生論

隋李公輔天命論

以上論

卷二十一

漢劉子政上戰國策敘

後漢許叔重說文解字序

王叔師楚詞章句序

晉陸士衡豪士賦序

石季倫思歸引序

郭景純山海經序

王逸少蘭亭集序

葛稚川抱朴子序

盧山道人遊石門詩序

宋張思光門律自序

齊任彥昇王文憲集序

梁昭明太子文選序 陶淵明集序

梁元帝內典碑銘集林序 全德志序 丹陽尹傳序 忠臣傳諫

諍篇序

劉孝綽昭明太子集序

劉孝標金華山栖志序 十五首

庾子慎書品序 言墓賦

北魏酈善長水經注序 賦

陳徐孝穆玉臺新詠序 賦

卷二十一 下 賦

漢司馬子長史記自序 京兆樊豐集賦 西京雜記

後漢班孟堅漢書序傳 晉書序

以上序類 五文 古 賦

卷二十二

珍做宋版印

漢董仲舒山川頌

王升司隸校尉楊孟文石門頌

漢故穀城長蕩陰令張君表頌

後漢蔡伯喈祖德頌 京兆樊惠渠頌

魏劉伯倫酒德頌

晉陸士衡漢高祖功臣頌

陸士龍盛德頌 登遐頌

孫興公聘士徐君墓頌

齊江文通閩中草木頌十五首

魏高伯恭徵士頌

晉陸士龍榮啓期贊像

夏侯孝若東方朔畫贊

郭景純山海經圖讚

袁彥伯三國名臣序贊

庾仲初虞舜像贊

戴安道閒遊贊

陶淵明讀史述九章

後漢揚子雲酒箴

晉裴逸民女史箴

江道載逸民箴

後漢張平子綬筥銘

崔子玉座右銘

蔡伯喈黃鉞銘

東鼎銘

中鼎銘

西鼎銘

士孫瑞劍銘

漢鏡銘二首

魏卞蘭座右銘

晉傅休奕擬金人銘作口銘

宋鮑明遠藥奩銘 石帆銘

梁元帝梁安寺刹下銘 漏刻銘 東宮後堂仙室山銘

庾慎之團扇銘

北周庾子山秦州天水郡麥積崖佛龕銘 東宮行雨山銘 東宮

玉帳山銘 至仁山銘 望美人山銘 明月山銘

漢崔子玉草書勢

後漢蔡伯喈篆勢 隸勢

晉衛巨山字勢

宋鮑明遠飛白書勢

以上雜頌贊箴銘

卷二十三

漢修西嶽廟記

後漢張昶西嶽華山堂闕碑銘

王延壽桐柏廟碑

成陽靈臺碑

蔡伯喈陳留索昏庫上里社碑

王仲宣荊州文學記

魏聞人牟準魏敬侯碑陰文

晉造戾陵遏記

齊王簡棲頭陀寺碑

梁沈休文桐柏山金庭館碑銘

梁簡文帝招真館碑 吳郡石像碑

梁元帝荊州放生亭碑 皇太子講學碑

徐孝穆司空徐州刺史侯安都德政碑 晉陵太守王勵德政碑

以上碑記

卷二十四

珍做宋版印

後漢蔡伯喈胡公碑銘 太傅文恭侯胡公碑 太傅胡公碑 楊

公碑 司空文烈侯楊公碑 漢太尉楊公碑 朱公叔墳前石

碑 陳太邱碑 郭有道林宗碑 貞節先生范史雲碑 袁滿

來墓碑 胡夫人黃氏神誥 胡夫人靈表 議郎胡公夫人哀

讚

齊王仲寶褚淵碑文

梁沈休文齊故安陸昭王碑文

北周庾子山周太子太保步陸逞神道碑 周大將軍司馬裔碑

周柱國長孫儉神道碑 周車騎將軍賀婁公神道碑

北魏温鵬舉常山公主碑

以上墓碑

卷二十五

漢王史威長葬銘

杜子夏臨終作文命刻石埋于墓前

宋臨澧侯劉使君墓誌

宋張氏墓誌

齊江文通宋安成王右常侍劉喬墓銘 宋光祿大夫孫奭墓銘

梁任彥昇劉先生夫人墓誌

梁簡文帝華陽陶先生墓誌銘 戎昭將軍劉顯墓銘

梁元帝庾先生承先墓誌 侍中吳平光侯墓誌銘

北魏溫鵬舉司徒元樹墓誌銘

宋徐修仁故永陽敬太妃墓誌銘

北魏崔敬邕墓誌銘

北魏故懷令李君墓誌銘

北周庾子山周大將軍懷德公吳明徹墓誌銘 周大將軍義興公

蕭公墓誌銘 周大將軍瑯玕定公司馬裔墓誌銘 周謙國夫

人步陸孤氏墓誌銘 周太傅鄭國公夫人鄭氏墓誌銘

後漢蔡伯喈為陳留上孝子狀

梁任彥昇齊竟陵文宣王行狀

沈休文齊司空柳世隆行狀

齊江文通建平王太妃周氏行狀

以上誌狀

卷二十六

後漢張平子大司農鮑德誄

魏曹子建王仲宣誄 仲雍哀詞

晉潘安仁楊荊州誄 楊仲武誄 夏侯常侍誄 馬泚督誄 傷

子辭 悲邢生辭 為任子咸妻作孤女澤蘭哀辭 金鹿哀辭

哀永逝文

陶淵明自祭文 祭從弟敬遠文

宋顏延年陽給事誄 陶徵士誄

王僧達祭顏光祿文

梁劉令嫺祭夫徐悱文

謝惠連祭古冢文

北周庾子山思舊銘

以上誄祭

右著錄若干篇指事述意之作也。或縝密而端慤，或豪侈而詘盪。蓋指事欲其曲以盡，述意欲其深以婉。澤以比興，則詞不迫；切資以故籍，故言爲典章也。韓非淮南已導先路，王符應劭其流。孔長立言之士，時有取焉。然枝葉已繁，或披其本以仲宣之覃精，而子桓病其體弱。亦學者之通患也。碑誌之文本與史殊體，中郎之作質，其有文可爲後法，故錄之，尤備焉。

駢體文鈔下編

駢體文鈔目錄

卷二十七

周淳于髡諷齊威王

宋玉對楚王問

漢東方曼倩答客難 非有先生論

揚子雲解嘲 解難

後漢班孟堅賓戲

張平子應問

崔亭伯達旨

蔡伯喈釋誨

晉東廣微元居釋

皇甫士安釋勸

夏侯孝若抵疑

以上設辭

卷二十八

漢枚叔七發

魏曹子建七啓

晉張景揚七命

梁何仲言七召

簡文帝七勵

以上七

卷二十九

漢揚子雲連珠

後漢班孟堅連珠

魏潘勗擬連珠

晉陸士衡演連珠五十首

宋謝惠連連珠

顏延年範連珠

齊王仲寶暢連珠

梁沈休文連珠

北周庾子山擬連珠四十四首

以上連珠

卷三十

魏文帝與吳質書 與鍾大理書 與吳質書

吳季重答魏太子牋

曹子建與吳季重書

吳季重答東阿王書

曹子建與楊修書

楊德祖答臨淄侯牋

吳季重在元城與魏太子牋

陳孔璋答東阿王牋 爲曹洪與魏文帝書

繁休伯與魏文帝牋

應德璉報龐惠恭書

應休璉與滿炳書 與廣川長岑文瑜書 與侍郎曹長思書 與

從弟君苗君胄書

晉陸士仁答從兄安成王書

陸士龍答車茂安書

宋鮑明遠登大雷岸與妹書

齊蕭子良與荊州隱士劉虬書

江文通與交友論隱書

梁昭明太子答湘東王求文集詩苑書 與何允書

梁簡文帝答徐摛書 與蕭臨川書 南康簡王薨上東宮啓

劉孝儀從弟喪上東宮啓

陶宏景答謝中書書

任彥昇為庾杲之與劉居士虬書

沈休文報博士劉杳書 陳情書與徐勉

劉孝綽報湘東王書

謝幾卿答湘東王書

吳叔庠與施從事書 與顧章書 與朱元思書

北周庾子山答趙王啓 答移市教

周宏讓與徐陵薦方圓書

梁徐孝穆答周宏讓書 與李那書

李那答徐陵書

北魏王子淵與周處士書

周宏讓答王褒書

梁史世休答東宮啓

祖鴻勳與陽休之書

劉孝標追答劉沼書

何仲言為衡山侯與婦書

北周庾子山為上黃侯世子與婦書

伏知道為王寬與婦義安主書

宋王元長謝竟陵王示扇啟 謝武陵王賜弓啟

齊謝元暉謝隨王賜紫梨啟 謝隨王賜左傳啟

梁昭明太子謝勅賚水犀如意啟 謝勅賚制大涅槃經講疏啟

十二月啟

梁簡文帝答南平嗣王餉舞簞書 答蕭子雲上飛白書 屏風書

答公主餉胡子一頭 謝賚扇啟 謝東宮賜裘啟 東宮上

掘得慈覺寺鐘啟

梁元帝謝勅賜第啟 上東宮古跡啟 謝東宮賜白牙縷管筆啟

謝晉安王賜馬啓 爲妾宏夜姝謝東宮賚合心花釵啓

劉孝儀謝鄱陽王賜鉢啓 謝晉安王賜宣城酒啓 謝東宮賜城

傍橘啓 謝東宮賜淨饌啓

劉孝威謝賚錦被啓

張伯緒謝東宮賚園啓

任孝恭謝賚錢治宅啓

庾慎之謝東宮賜宅啓 謝東宮賚米啓 謝東宮賚古跡啓 謝

賚梨啓 謝武陵王賚白綺綾啓 謝歷日啓 答陶隱居賚朮

煎啓

北周庾子山謝滕王集序啓 謝趙王賚馬并繖啓 謝明帝賜絲

布等啓 謝趙王賚息絲布啓 謝趙王賚絲布啓 謝趙王示

新詩啓 謝趙王賚白羅袍袴啓 謝滕王賚馬啓 謝趙王賚

犀帶啓 謝趙王賚米啓 謝趙王賚乾魚啓

以上殘牘

卷三十一

漢王子淵僮約 責髯奴文

晉陸士龍牛責季友文

吞道元與吞公牋

後漢戴文讓失父零丁

梁吳叔庠餅說

後漢班孟堅奕旨

梁劉孝儀探物豔體連珠

陶通明授陸敬游十賚文

袁陽源雞九錫文并勸進

韋琳鮒表

沈休文修竹彈甘蕉文

吳叔庠檄江神責周穆王壁

孔德璋北山移文

後漢糜元弔夷齊文

晉陸衡弔魏武帝文

陳沈初明經通天臺奏漢武表

魏曹子建釋愁文

梁王僧孺懺悔禮佛文

簡文帝爲人作造寺疏

後漢仲長公理樂志論

梁蕭大圖志言

以上雜文

右著錄若干篇多緣情託興之作戰國詼諧辨譎者流實肇厥端其
言小其旨淺其趣博往往託思於言表潛神于旨裏引情于趣外是

故小而能微淺而能永博而能檢就其編者亦潤理內苞秀采外溢不徒以縷繪爲工逋峭取致而已後之作者乃以爲游戲佻側洸盪忘其所歸遂成俳優病尤甚焉尺牘之美非關造作妍媸雅鄭每肖其人齊梁啓事短篇藻麗間見既非具體無關效法十而存一概可知也

少讀文選頗知步趨齊梁後蒙

恩入庶常臺閣之製例用駢體而不能致工因益搜輯古人遺篇用資時習區其鉅細分爲三編序而論之曰天地之道陰陽而已奇偶也方圓也皆是也陰陽相並俱生故奇偶不能相離方圓必相爲用道奇而物偶氣奇而形偶神奇而識偶孔子曰道有變動故曰爻爻有等故曰物物相雜故曰文又曰分陰分陽迭用柔剛故易六位而成章相雜而迭用文章之用其盡於此乎六經之文班班具存自秦迄隋其體遞變而文無異名自唐以來始有古文之目而目六朝之

文爲駢儷而爲其學者亦自以爲與古文殊路既歧奇與偶爲二而於偶之中又歧六朝與唐與宋爲三夫苟第較其字句獵其影響而已則豈徒二焉三焉而已以爲萬有不同可也夫氣有厚薄天爲之也學有純駁人爲之也體格有遷變人與天參焉者也義理無殊途天與人合焉者也得其厚薄純雜之故則于其體格之變可以知世焉於其義理之無殊可以知文焉文之體至六代而其變盡矣沿其流極而泝之以至乎其源則其所出者一也吾甚惜夫歧奇偶而二之者之毗於陰陽也毗陽則躁剽毗陰則沉隄理所必至也於相雜迭用之旨均無當也李兆洛序

因端竟委之言披文相質之旨非深於學博乎文者不能及此

往年評駢體文鈔以李氏多精到語又自童幼誦讀丹黃雜題散見他所故辛亥秋棘闈評本識語甚略閱數年在安慶讀連珠七林有悟復于此本加墨篇各下語大旨不殊李氏偶有獨照亦匪定論以埃知者耳官全板日行縣村舍中輒攜此書今年秋始再卒業篋中兩本評識詳略異同學子好事者爲合寫亦微有益于文章機杼耶評此二本皆由後而前卷後題記月日著陳述焉以自娛辛巳閏七月十有七日廷獻書時新令將上官漫卷詩書矣

李氏錄文未注所本體例不及張氏賦鈔之善亡友莊仲求有校定本甚精不可復見獻又書

獻質漸子與雅好文章李氏斯篋恆在几席勞人道長無間舟車日月不淹廿有餘載丹黃點勘錯出他本縑素是非久不自識光緒乙亥于役鎖院四十餘日白下涼秋蕭瑟而已獨處多暇隱几微吟重發行篋首尾加墨簡書事竟卒業曩篇初心夙好頗有異同進退之故以誌羣彥九月十日雨後譚獻記

後得蔣季御刻嚴鐵橋全唐以前文目補注目錄下前人之勞後人之逸也獻再記

駢體文鈔卷一

銘刻類

李斯繹山刻石

史記始皇二十八年始皇東行郡縣上鄒嶧山立石與魯諸生議刻石頌秦德按此文史記獨不載然其詞固非後人○○○疏鑿大手奚斯吉甫亦畏其橫初變詩書一以駮厲疏鑿大手

此在泰山立石之前初誇大其并兼六國故首述其在昔稱王繼

及上薦高號繼乃頌其一家天下而不及其餘

皇帝立國維初在昔嗣世稱王討伐亂逆威動四極武義直方戎臣奉詔經時不久滅六暴強廿有六年上薦高號孝道顯明既獻泰成乃降專惠親巡遠方登於嶧山羣臣從者咸思攸長追念亂世分土建邦以開爭理攻戰日作流血於野自泰古始世無萬數地及五帝莫能禁止迺今皇帝壹家天下兵不復起燭害滅除黔首康定利澤長久羣臣誦略刻此樂石以箸經紀

皇帝曰金石刻盡始皇帝所為也今襲號而金石刻辭不稱始皇帝其於久遠也如後嗣為之者不稱成功盛德丞相臣斯臣去疾御史

大夫臣德昧死言臣請具刻詔書金石刻因明白矣臣昧死請制曰

可

李斯泰山刻石

史記二十八年始皇東行郡縣上鄒嶧山立石與魯諸生議刻石頌秦德議封禪望祭山川之事遂上泰

山立石封祠祀下禪梁父刻所立石

○○○精碩亦何減誓誥

此以封禪望祭立石故其詞特莊

皇帝臨位作制明法臣下修飭二十有六年初并天下罔不賓服親巡遠方黎民登茲泰山周覽東極從臣思迹本原事業祇誦功德治道運行諸產得宜皆有法式大義休明垂于後世順承勿革皇帝躬聖既平天下不懈于治夙興夜寐建設長利專隆教誨訓經宣達遠近畢理咸承聖志貴賤分明男女禮順慎遵職事昭隔內外靡不清淨施于後嗣化及無窮遵奉遺詔永承重戒

李斯琅玕臺刻石

史記於是乃並海以東過黃腫窮成山登之罘立石頌秦德焉而去南登琅玕大樂之作琅玕臺立

石刻頌秦德明得意

○○○囊括并吞之氣振盪于文字間

前半是頌秦德。後半是明得意。始皇登琅玕而大樂之。故其詞特鋪張盡致。此及上二刻皆二十八年所立而詞皆稱二十六年者。原并天下之始而言也。

維二十六年皇帝作始端平法度萬國之紀以明人事合同父子聖智仁義顯白道理東撫東土以省士卒事已大畢乃臨于海皇帝之功勤勞本。事。上。農。除。末。黔。首。是。富。普。天。之。下。搏。心。揖。志。器。械。一。量。同。書。文。字。日。月。所。照。舟。輿。所。載。皆。終。其。命。莫。不。得。意。應。時。動。事。是。維。皇。帝。匡。飭。異。俗。陵。水。經。地。憂。恤。黔。首。朝。夕。不。懈。除。疑。定。法。咸。知。所。辟。方。伯。分。職。諸。治。經。易。舉。錯。必。當。莫。不。如。畫。皇。帝。之。明。臨。察。四。方。尊。卑。貴。賤。不。踰。次。行。姦。邪。不。容。皆。務。貞。良。細。大。盡。力。莫。敢。怠。荒。遠。邇。辟。隱。專。務。肅。莊。端。直。敦。忠。事。業。有。常。皇。帝。之。德。存。定。四。極。誅。亂。除。害。興。利。致。福。節。事。以。時。諸。產。繁。殖。黔。首。安。寧。不。用。兵。革。六。親。相。保。終。無。寇。賊。驩。欣。奉。教。盡。知。法。式。六。合。之。內。皇。帝。之。土。西。涉。流。沙。南。盡。北。戶。東。有。東。

海北過大夏人迹所至無不臣者功蓋五帝澤及牛馬莫不受德各安其宇維秦王兼有天下立名為皇帝乃撫東土至于琅玕列侯武城侯王離列侯通武侯王賁倫侯建成侯趙亥倫侯昌武侯成倫侯武信侯馮毋擇丞相隗狀丞相王綰卿李斯卿王成五大夫趙嬰五大夫楊樛從與議于海上曰古之帝者地不過千里諸侯各守其封域或朝或否相侵暴亂殘伐不止猶刻金石以自為紀古之五帝三王知教不同法度不明假威鬼神以欺遠方實不稱名故不久長其身未歿諸侯背叛法令不行今皇帝并一海內以為郡縣天下和平昭明宗廟體道行德尊號大成羣臣相與誦皇帝功德刻于金石以為表經維秦王兼有天下以下乃誦之○○○古昔作序未有不居後序也反居誦後所以重誦也者其身未歿云云識烈于胡亡

李斯之果立石

史記二十九年始皇東遊登之果刻石

○穎銳稍變

史記二十八年登之果立石二十九年登之果刻石蓋即刻所立

之石也

維二十九年時在中春陽和方起皇帝東游巡登之罘臨照于海從
臣嘉觀原念休烈追誦本始大聖作治建定法度顯著綱紀外教諸
侯光施文惠明以義理六國回辟貪戾無厭虐殺不已皇帝哀衆遂
發討師奮揚武德義誅信行威燁旁達莫不賓服烹滅彊暴振救黔
首周定方極普施明法經緯天下永爲儀則大矣哉宇縣之中承順
聖意羣臣誦功請刻于石表垂于常式

李斯東觀刻石○○○

各極侈斂之用

維二十九年皇帝春游覽省遠方逮于海隅遂登之罘昭臨朝陽觀
望廣麗從臣咸念原道至明聖法初興清理疆內外誅暴彊武威旁
暢振動四極禽滅六王闡并天下蓄害絕息永偃戎兵皇帝明德經
理宇內視聽不怠作立大義昭設備器咸有章旗職臣遵分各知所
行事無嫌疑黔首改化遠邇同度臨古絕尤常職既定後嗣循業長

承聖治羣臣嘉德祇誦聖烈請刻之采

李斯碣石刻石

史記三十二年始皇之碣石刻碣石門壞城郭決通隄防

○○○變化盡奇

特從壞城郭決通隄防用意為後人因事立碑之式 東觀碣石

二刻皆按時事言之昭設備器職臣遵分常職既定云云語皆有

所指也

遂興師旅誅戮無道為逆滅息武殄暴逆文復無罪庶心咸服惠論

功勞賞及牛馬恩肥土域皇帝奮威德并諸侯初一泰平

平當為字與阻撫韻

墮壞城郭決通川防夷去險阻地勢既定黎庶無繇天下咸撫男樂

其疇女修其業事各有序惠被諸產久並來田莫不安所羣臣誦烈

請刻此石垂著儀矩

李斯會稽刻石

史記三十七年始皇出游上會稽祭大禹望于南海而立石刻頌秦德

○○○

此在焚書坑儒大定法制之後故有考驗事實貴賤並通云云楚

越俗薄故於宣義廉清尤詳言之也 秦相他文無不詆麗頌德

立石一變爲樸渾知體要也其詞其氣便欲破除詩書自作古始亦卽焚書坑儒伎倆

皇帝休烈平一字內德惠修長三十有七年親巡天下周覽遠方遂登會稽宣省習俗黔首齊莊羣臣誦功本原事迹追首高明秦聖臨國始定刑名顯陳舊章初平法式審別職任以立恆常六王專倍貪戾傲猛率衆自強暴虐恣行負力而驕數動甲兵陰通間使以事合從行爲辟方內飾詐謀外來侵邊遂起禍殃義威誅之殄息暴悖亂賊滅亡聖德廣密六合之中被澤無疆皇帝并字兼聽萬事遠近畢清運理羣物考驗事實各載其名貴賤並通善否陳前靡有隱情飾省宣義有子而嫁倍死不貞防隔內外禁止淫泆男女絜誠夫爲寄殺之無罪男秉義程妻爲逃嫁子不得母咸化廉清大治濯俗天下承風蒙被休經皆遵度軌和安敦勉莫不順令黔首修潔人樂同則嘉保太平後敬奉法常治無極輿舟不傾從臣誦烈請刻此石光

垂休銘

清峻又爲一格前後反正爲章法較有蹊隧

班孟堅高祖泗水亭碑銘

○○已有姿致

漸就整密一變西漢之

全學子雲古勁便欲相匹

皇皇聖漢兆自沛豐乾降著符精感赤龍承魑流裔襲唐末風寸天
尺土無埃斯亭建號宣基維以沛公揚威斬蛇金精催傷涉關陵郊
係獲秦王應門造勢斗璧納忠天期乘祚受爵漢中勒陳東征剗擒
三秦靈威神佑鴻溝是乘漢軍改歌楚衆易心誅項討羽諸夏以康
陳張畫策蕭勃翼終出爵褒賢裂土封功炎火之德彌光以明源清
流潔本盛未榮敘將十八贊述股肱休勳顯祚永永無疆國寧家安
我君是升根生葉茂舊邑是仍於皇舊亭苗嗣是承天之福祐萬年
是興

班孟堅十八侯銘

○○但見氣體無句可掇高于全史贊語

兢兢相國宏策不追御國維綱秉統樞機文昌四友漢有蕭何序功

第一受封于鄴右鄴侯 兢兢將軍威蓋不當操盾千鈞拔主項堂興

漢破楚矯矯忠良卒為丞相帝室以康右將軍舞 赫赫將軍受兵黃

石規圖勝負不出帷幄命惠瞻仰安全正朔國師是封光榮舊宅右

軍留侯 懿懿太尉醇厚樸誠輔翼受命應節御營歷位卿相土國兼

并見危致命社稷以寧右太尉絳 蹇蹇相國允忠克誠臨危處險安

而匡傾興代之際濟主立名身履國土秉御乾楨右將軍平 洋洋丞

相勢譎師旅擾攘楚魏為漢謀主六奇解厄揚名于後右丞相戶 堂

堂張敖耳之遺萌以誠佐國序跡建忠功成德立襲封南宮垂號萬

春永保無疆右南宮 衍衍衛尉德行循規遭兄食其隕歿於齊橫取

愧景刎頸自獻金紫褒表萬世不刊右衛尉曲 煌煌將軍輔漢久長

威震呂氏姦惡不揚寇攘殄盡躬迎代王功顯帝室萬世益章右將

陽侯 斌斌將軍鷹武是揚內康王室外鎮四方諸夏又安流及要荒

聲騁海內苗嗣紀功右將軍汝陰 休休將軍如虎如羆御師勒陳破

敵以威靈金曜楚火流烏飛將命仗節功績永垂右將軍陽斤斤將

軍忠信孔雅出身六師十二四旅折衝扞難遂寧天下金龜章德建

號傳後右將軍信明明丞相天賦庭直剛德正行不枉不曲功業成

著榮顯食邑距呂奉主昭然不惑右丞相安桓桓將軍輔主克征奉

使全璧身出項營序功差德履讓以平轉北而遊雲中以傾右將軍

信巖巖將軍帶武佩威御雄乘險難困不違仇滅主定四海是楨功

成食土德被遐邇古文苑注○右將軍棘晏晏曲成輿從龍騰安危

從主赤曜以升赫赫皇皇道彌光明惟德御國流及後萌右曲成肅

肅御史以武以文相趙距呂志安君身徵詣行所如意不全天秩邑

土勳乃永存右御史大夫邑邑將軍育養烝徒建謀正直行不匿邪

入軍討敵項定天都佩雀雙印百里為家右將軍青

班孟堅封燕然山銘○○○瑰璋絕特追琢金玉之文崔蔡能為也

寬博

惟永元元年秋七月有漢元舅曰車騎將軍竇憲寅亮聖王登翼王
室納于大麓惟清緝熙乃與執金吾耿秉述職巡禦治兵于朔方鷹
揚之校螭虎之士爰該六師暨南單于東胡烏桓西戎氐羌侯王君
長之羣驍騎十萬元戎輕武長轂四方雷輜蔽路萬有二千餘乘勒
以八陣莅以威神元甲耀日朱旗絳天遂凌高闕下雞鹿經磧鹵絕
大漠斬溫禺以釁鼓血尸逐以染鏑然後四校橫徂星流彗掃蕭條
萬里野無遺寇於是域滅區殫反旆而旋考傳驗圖窮覽其山川遂
踰涿邪跨安侯乘燕然躡冒頓之區落焚老上之龍庭將上以據高
文之宿憤光祖宗之元靈下以安固後嗣恢拓境宇振大漢之天聲
茲可謂一勞而久逸暫費而永寧也乃遂封山刊石昭銘盛德其辭
曰鑠王師兮征荒裔勦凶虐兮截海外奠其邈兮巨地界封神邱兮
建隆嶺熙帝載兮振萬世

蔡伯喈光武濟陽宮碑

○○

厚重

上追孟堅

碑刻之文至伯喈

別成規矩遂爲千秋效法

中郎之文皆雍雍矩度

惟漢再受命曰世祖光武皇帝考南頓君初爲濟陽令濟陽有武帝行過宮常封閉帝將生考以令舍下溼開宮後殿居之建平元年十一月甲子夜帝生時有赤光室中皆明使卜者王長卜之長曰此善事不可言是歲有嘉禾一莖生九穗長於凡禾因爲尊諱王室中微哀平短祚姦臣王莽偷有神器十有八年罪盈惡熟天人致誅帝乃龍見白水淵躍昆螿破前隊之衆殄二公之師收兵略地經營河朔戮力戎功翼戴更始義不卽命帝位闕焉於是羣公諸將據河洛之文叶符瑞之珍僉曰歷數在帝踐祚允宜乃以建武元年六月己未卽位鄴縣之陽五成之陌祀漢配天不失舊物享國三十三年方內又安蠻夷率服巡狩泰山禪梁父皇代之遐迹帝者之上儀罔不畢舉道德餘慶延于無窮先民有言樂樂其所自生而禮不忘其本是以虞稱媯汭姬美周原皇天乃眷神宮實始于此厥跡邈哉所謂神

麗顯融越不可尙。小臣河南尹鞏瑋先祖銀艾封侯。歷世卿尹。受漢厚恩。瑋以商箕餘烈。郡舉孝廉。爲大官丞。來在濟陽。顧見神宮。追惟桑梓。褻述之義。用敢作頌。頌曰。

赫赫炎天。爰耀其輝。篤生聖皇。貳漢之微。稽度虔則。誕育靈姿。黃孽作慝。篡握天機。帝赫斯怒。爰整其師。應期潛見。扶陽而飛。禍亂克定。羣兇殄夷。匡復帝載。萬國以綏。巡于四嶽。展義省方。登封降禪。升于中皇。爰茲初基。天命孔彰。子子孫孫。保之無疆。

曹子建制命宗聖侯孔羨奉家祀碑。○。閱約茂懿。

亦是步武中郎。垂縮縱送頗窺太史不僅步武中郎

維黃初元年。大魏受命。脩軒轅之高蹤。紹虞氏之遐統。應歷數以改物。揚仁風以作教。於是輯五瑞。班宗彝。鈞衡石。同度量。秩羣祀於無文。順天時以布化。旣乃緝熙聖緒。紹顯上世。追存三代之禮。兼紹宣尼之後。以魯縣百戶命孔子。二十一世孫議郎孔羨爲宗聖侯。以奉

孔子之祀制詔三公曰昔仲尼負大聖之才懷帝王之器當衰周之末而無受命之運在魯衛之朝教化洙泗之上栖栖焉皇皇焉欲屈己以存道貶身以救世於是王公終莫能用之乃退考五代之禮修素王之事因魯史而制春秋就太史而正雅頌俾千載之後莫不宗其文以述作仰其聖以謀咨可謂命世大聖億載之師表者也遭天下大亂百祀墮壞舊居之廟毀而不修褒成之後絕而莫繼闕里不聞講誦之聲四時不睹蒸嘗之位斯豈所謂崇禮報功盛德必百世祀者哉嗟乎朕甚憫焉其以議郎孔羨爲宗聖侯邑百戶奉孔子之祀令魯郡修起舊廟置百石卒史以守衛之又於其外廣爲屋宇以居學者於是魯之父老諸生游士睹廟堂之始復觀俎豆之初設嘉聖靈於髣髴想禎祥之來集乃慨然而嘆曰大道衰廢禮樂絕滅三十餘年皇上懷仁聖之懿德兼二儀之化育廣大包於無方淵深淪於不測故自受命以來天人咸和神氣氤氳嘉瑞踵武休徵屢臻殊

俗解編髮而慕義遐夷越險阻而來賓雖大皞遊龍以君世虞氏儀
鳳以臨民伯禹命元宮而爲夏后西伯由岐社而爲周文尙何足稱
於大魏哉若乃紹繼微絕興修廢官疇咨稽古崇配乾坤況神明之
所福作宇宙之所觀欣欣之色豈徒魯邦而已哉爾乃感殷人路寢
之義嘉先民泮宮之事以爲高宗僖公蓋嗣世之王諸侯之國耳猶
著德於三代騰聲於千載況今聖王肇造區夏創業垂統受命之日
曾未下輿而褒美大聖隆化如此能無頌乎乃作頌曰

煌煌大魏受命溥將繼體黃唐包夏含商降釐下土廓清三光羣祀
咸秩靡事不綱嘉彼元聖有赫其靈遭世霧亂莫顯其榮褒成旣絕
寢廟斯傾闕里蕭條靡紹靡馨我皇悼之尋其世武乃建宗聖以紹
厥後修復舊堂豐其薨宇莘莘學徒爰居爰處王教旣新羣小盪沮
魯道以興永作憲矩洪聲豈遐神祇來和休徵雜遘瑞我邦家內光
區域外被荒遐殊方慕義搏拊揚歌於赫四聖運世應期仲尼旣沒

文亦在茲彬彬我后越而五之垂於億載如山之基

曹子建承露盤銘

有序一作頌

倅色揣稱

皇帝鑄承露盤莖長十二丈大十圍上盤逕四尺下盤逕五尺銅龍
遶其根龍身長一丈背負兩子自立於芳林園甘露乃降使臣為銘
銘曰岌岌承露峻極太清神若礪魄洪基嶽停下潛醴泉上受雲英
和氣四充翔風所經匪我明后孰能經營近歷纏度三光朗明殊俗
歸義祥瑞混并鸞鳳晨棲甘露宵零神物攸協高而不傾奉天戴巍
恭統神器固若露盤長存永貴賢聖繼跡奕世明德不忝先功保茲
皇極垂祚億兆永荷天秩

陸佐公新刻漏銘

○整栗有度

辭尚體要淵規淑靈

銘起盤盂辨物當名貴覈而肅文雖失於辟積而密藻可觀

夫自天觀象昏旦之刻未分治歷明時盈縮之度無準挈壺命氏遠
哉義用揆景測辰徼宮戒井守以水火分茲日夜而司歷亡官疇人

廢業孟陬殄滅攝提無紀衛宏載傳呼之節較而未詳霍融敘分至之差詳而不密陸機之賦虛握靈珠孫綽之銘空擅崑玉宏度遺篇承天垂旨布在方策無彰器用譬彼春華同夫海棗寧可以軌物治民作範垂訓者乎且今之官漏出自會稽積水違方導流乖則六日無辨五夜不分歲躔闋茂月次姑洗皇帝有天下之五載也樂遷夏諺禮變商俗業類補天功均柱地河海夷晏風雲律呂坐朝晏罷每日晨興屬傳漏之音聽維人之響以爲星火謬中金水違用時乖啓閉箭異鎔銖爰命日官草創新器於是俯察旁羅登臺升庫則于地四參以天一建武遺蠹咸和餘舛金筒方員之制飛流吐納之規變律改經一皆懲革天監六年太歲丁亥十月丁亥朔十六日壬寅漏成進御以考辰正晷測表候陰不謬圭撮無乖黍累又可以校運算之睽合辨分天之邪正察四氣之盈虛課六歷之疏密永世貽則傳之無窮赫矣煥乎無得而稱也昔嘉量微物盤盂小器猶且昭德記

功載在銘典。況入神之制。與造化合符。成物之能。與坤元等契。勳倍楹席。事百巾机。寧可使多謝。曾水有陋。昆吾金字。不傳銀書。未勒者哉。乃詔小臣為其銘曰。

一暑一寒。有明有晦。神道無跡。天工罕代。乃置挈壺。是惟熙載。氣均衡石。晷正權概。世道交喪。禮術銷亡。遽遷水火。爭倒衣裳。擊刁舛次。聚木乖方。爰究爰度。時惟我皇。方壺外次。圓流內襲。洪殺殊等。高卑異級。靈虬承注。陰蟲吐噏。儵往忽來。鬼出神入。微若抽繭。逝如激電。耳不輟音。眼無留眄。銅史司刻。金徒抱箭。履薄非兢。臨淵罔戰。授受靡讐。登降弗爽。惟精惟一。可法可象。月不知來。日無藏往。分似符契。至猶影響。合昏暮卷。莫莢晨生。尚辨天意。猶測地情。況我神造。通幽洞靈。配皇等極。為世作程。製作大手。整栗自然。豈燕許沈宋所能。

陸佐公石闕銘。○寬緩是當時文體。難盡責以尊嚴。惟組練含容。功力自遜。刻漏。

以典章法度之所係。而絕無尊嚴閱鉅之思詞。靡裁疎不及刻漏。

銘遠矣。錄而論之，以示軌轍。

昔在舜格文祖，禹至神宗。周變商俗，湯黜夏政。雖革命殊乎，因襲揖讓異於干戈。而晷緯冥合，天人啓基。克明峻德，大庇生民。其揆一也。在齊之季，昏虐君臨。威侮五行，怠棄三正。刑酷然炭，暴踰膏柱。民怨神怒，衆叛親離。踏地無歸，瞻烏靡托。於是我皇帝拯之，乃操斗極，把鈎陳翼，百神禔萬福。龍飛黑水，虎步西河。雷動風驅，天行地止。命旅致屯雲之應，登壇有降火之祥。龜筮協從，人祇響附。穿胸露頂之豪，箕坐椎髻之長。莫不援旗請奮，執銳爭先。夏首憑固，庸岷負阻。協彼離心，抗茲同德。帝赫斯怒，秣馬訓兵。嚴鼓未通，凶渠泥首。宏舸連軸，巨艦接牖。鐵馬千羣，朱旗萬里。折簡而禽廬九，傳檄以下。相羅兵不血刃，士無遺鏃。而樊鄧威懷，巴黔泥首。於是流湯之黨，握炭之徒。守似藩籬，戰同枯朽。革車近次，師營商牧。華夷士女，冠蓋相望。扶老攜幼，一旦雲集。壺漿塞野，簞食盈塗。似夏民之附成湯，殷士之窺周武。

安老懷少伐罪弔民農不遷業市無易買八方入計四隩奉圖羽檄
交馳軍書狎至一日二日非止萬機而尊嚴之度不讐於師旅淵默
之容無改於行陣計如投水思若轉規策定帷幄謀成几案曾未浹
辰獨夫授首乃焚其綺席棄彼寶衣歸旋臺之珠反諸侯之玉指麾
而四海隆平下車而天下大定拯茲塗炭救此橫流功均天地明並
日月於是仰叶三靈俯從億兆受昭華之玉納龍敍之圖類帝裡宗
光有神器昇中以祀羣望攝袂而朝諸夏布教都畿班政方外謀協
上策刑從中典南服緩耳西羈反舌劍騎穹廬之國同舟共穴之人
莫不屈膝交臂厥角稽顙鑿空萬里攘地千都幕南罷鄆河西無警
於是治定功成邇安遠肅忘茲鹿駭息此狼顧乃正六樂治五禮改
章程創法律置博士之職而著錄之生若雲開集雅之館而款關之
學如市興建庠序啓設郊丘一介之才必記無文之典咸秩於是天
下學士靡然向風人識廉隅家知禮讓教臻侍子化洽期門區宇乂

安方面靜息役休務簡歲阜民和歷代規模前王典故莫不芟夷翦
截允執厥中以爲象闕之制其來已遠春秋設舊章之教經禮垂布
憲之文戴記顯遊觀之言周史書樹闕之夢北方明月西極流精海
岳黃金河庭紫貝蒼龍元武之製銅雀鐵鳳之工或以聽窮省冤或
以布化懸法或以表正王居或以光崇帝里晉氏浸弱宋歷威夷禮
經舊典寂寥無記鴻規盛烈湮沒罕稱乃假天闕於牛頭託遠圖於
博望有欺耳目無補憲章乃命審曲之官選明中之士陳圭置臬瞻
星揆地興復表門草創華闕於是歲次天紀月旅太簇皇帝御天下
之七載也構茲盛則興此崇麗方且趨以表敬觀而知法物覩雙碣
之容人識百重之典作範垂訓赫矣壯乎爰命下臣式銘盤石其辭

曰

惟帝建國正位辨方周營洛涘漢啓岐梁居因業盛文以化光爰有
象闕是惟舊章青蓋南泊黃旗東指懸法無聞藏書弗紀大人造物

龍德休否建此百常興茲雙起偉哉偃蹇壯矣巍巍旁映重疊上連翠微布教方顯浹日初輝懸書有附委篋知歸鬱崛重軒穹隆反宇形聳飛棟勢超浮柱色法上圓製模下矩周望原隰俛臨烟雨前賓四會却背九房北通二轍南湊五方暑來寒往地久天長神哉華觀永配無疆

銘詞不窮

温鵬舉寒陵山寺碑

○○

天矯騰驤負聲結響振清綺以雄麗宜子山之傾倒也

此亦紀功碑也託之佛寺已為失體文亦委爾不振以其為唐初等慈昭仁諸文嚆矢故仍錄之

必以為具體亦拘

昔晉文尊周續宣於踐土齊桓霸世威著於邵陵並道冠諸侯勳高天下衣裳會同之所兵車交合之處寂寞消沉荒涼磨滅言談者空知其名遙遇者不識其地然則樹銅表跡刊石記功有道存焉可不尚歟永安之季數鍾百六天災流行人倫交喪爾朱氏既絕彼天綱斷茲地紐祿去王室政出私門銅馬競馳金虎亂噬九嬰暴起十日

並出破壁毀珪人物既盡頭會箕歛杼軸其空大丞相渤海王命世
作宰惟幾成務標格千仞崖岸萬里運鼎阿於襟抱納山岳於胸懷
擁元雲以上騰負青天而高引鐘鼓嘈囀上聞于天旌旗繽紛下盤
於地壯士凜以爭先義夫憤而競起兵接刃於斯場車錯轂於此地
轟轟隱隱若轉石之墜高崖硲硲磴磴如激水之投深谷俄而霧捲
雲除冰離葉散靡旗蔽日亂徹滿堦楚師之敗於栢舉新兵之退自
昆陽以此方之未可同日既考茲沃壤建此精廬砥石礪金瑩珠琢
玉經始等於佛功制作同於造化息心是歸淨行攸處神異畢臻靈
仙總萃鳴玉鸞以來遊帶霓裳而至止翔鳳紛以相嚙飛龍蜿而俱
躍雖復高天銷於猛炭大地淪於積水固以傳之不朽終亦記此無
忘。

王子淵上庸公陸騰勒功碑○

設色不單怯措意沈靜亦是完篇

方之齊梁浮響尙少

在昔洞庭彭蠡三苗有遠竄之君太室陽城九州無同姓之國是知周衛設險所務非山川河岳作固所寶惟休德至于三峽蹇產九折崢嶸高峯尋雲深谷無景秦開漢閉雖阻荷戟之虞魏塞晉通終因束馬之利我大周開闢宇宙混同文軌御六氣于天樞頓八紘于地絡彭濮未恭叩箚不討外憑劍道之難內負銅梁之厄大將軍上庸公仗國威靈奉辭伐罪長戟萬隊巨艦千舳板楯酋豪斯榆君長歷稔逋寇累代稽誅廓清江源蕩滌巴濮若夫荆門千里蜀置永安之宮巴水三迴吳阻夷陵之縣巫峽使君之灘淪波洽沒建平督郵之道棧徑威紆路阻蠻陬途橫夷落擅強專險輕法侮吏天子爰詔有司公奉天討星言載塗指日邁邁冊授公大將軍信州刺史韓信召拜軍中致設壇之禮衛青出征臨河聞後距之令夫鍾鼎大禮之器昭德必書金石不朽之質庸勳斯樹某等乃建碑于某地敢作頌云遐觀命氏眇求世祿龍圖紀河鴻漸于陸霸楚傳性命吳啓族君子

篤生降靈惟岳朝陽擢彩荆山曜璞巴庸自擅彭濮稱王南泊燹道
西通夜郎內憑玉壘外阻銅梁介視荒服斗絕邊疆赫赫南仲堂堂
方叔天子命我遐征越逐竇氏車騎去病冠軍封山刊石鐫銘刻勳
遠隔年代懸感風雲盛德必祀千載斯文銘語奇逸此意他又未見

薛元卿老氏碑○

從容大雅不厭鋪敘

文字因題而異亦因所施而異意存揚頌遂泛濫而忘其所歸是
忘題也爲老氏立碑不詳立碑之意而詳立碑之人是忘其所施
也自梁以下其蔽皆然駢體之遂爲分途皆自此等爲之厲也

此唐初四傑之先聲其小異者尙有疎樸之致

評以疎樸頗入微
南朝文章惟晉人

有之耳

自太極權輿上元開闢舉天維而懸日月橫地角而載山河一消一
息之精靈上生下生之氣候固以財成庶類亭毒羣品有人民焉有
君長焉至若上皇邃古夏巢冬穴靜神息智鶉居鷄飲大禮與天地

同節非折疑于俎豆大樂與天地同和豈考擊于鐘鼓逮乎失道後德失德後仁皇王有步驟之殊民俗有淳醜之變于是儒墨爭驚名法並馳禮經三百不能檢其情性刑典三千未足息其奸宄故知潔其流者澄其源直其末者正其本源原本本其唯大道乎老君感星載誕莫測受氣之由指樹爲姓未詳吹律之本含靈在孕七十餘年生而白首因以老子爲號其狀也三門雙柱表耳鼻之奇蹈五把十影手足之異爰自伏羲至于周氏綿祀歷代見質變名在文王武王之時居藏史柱史之職市朝屢易容貌不改宣尼一覩嘆龍德之難知關尹四望識真人之將隱乃發揮衆妙著書二篇率性歸道以無爲用其辭簡而要其旨深而遠飛龍成卦未足比其精微獲麟筆削不能方其顯晦用之治身則神清志靜用之治國則反朴還淳旣而鍊形物表卷迹方外蛻裳鶴駕往來紫府金漿玉酒讌衍清都參日月之光華與天地而終始涉其流者則擯落囂塵得其門者則騰驤

雲霧大椿凋茂非蜉蝣之所知溟渤淺深豈馮夷之能測盛矣哉固
無德而稱也莊周云老聃死秦佚弔之三號而出是謂遁天之刑雖
復傲吏之寓言抑亦蟬蛻之微旨皇帝誕靈縱睿接統膺期照春陵
之赤光發芒山之紫氣珠衡月角天表冠于百王明鏡衢罇聖德會
於千祀周道云季多難在時九鼎共海水同飛兩日與洛川俱鬪天
齊地軸之所蛇食鯨吞銅陵玉壘之區狼顧鴟跂黃延奸宄鄭阻兵
禍大縱毒螫將遍函夏神謀內斷靈武外馳應攙搶而掃除仗旄鉞
而斬伐共工既翦重立乾坤蚩尤就戮更調風雨宰制同造化之功
生靈荷魂魄之賜萬方欣戴九服謳歌乃允答天人祗膺揖讓升泰
壇而禮上帝坐明堂而朝羣后昔軒轅顓頊建國不同大昊少昊邦
畿各異舜改堯都夏遷虞邑歷選前辟義存創造惜十家之產愛兆
民之力經始帝君不移天府規摹紫極仍據皇圖下宇上棟務存卑
儉右平左城聿遵制度朝夕正殿不別起於鸞鸞升降靈臺豈更營

于鵙。鵙憂勞庶績矜育蒼主念茲在茲發于寤寐棘林肺石特降皇
情祝網泣辜深存寬簡草纓知恥畫服與慚天無入牢之星地絕城
牛之氣延閣廣內考集羣典石渠璧水闡揚儒業綴五禮于將壞正
六樂于已崩總章溺志之音太師成功之頌承華養德作貳東朝外
正萬邦內宏三善兩離炳曜重日垂明永固洪基克隆鼎祚重以維
城磐石多藝多才良佐寶臣允文允武爲王室之藩屏成神化之丹
青致世俗于潤塗納烝民于壽域旄頭垂象窮變成形獯獫作患其
來久矣無上算以制之用下策而難服自我開運耀德戢兵感義懷
仁稱藩請朔稽顙款塞匍匐投掌犴犴夜郎之所靡漢桑乾之地咸
被聲教並入提封閩越勾吳不愆貢職夫餘肅慎無絕夷邸遐邇視
福文軌大同自三代之餘六雄競逐秦居閩位漢雜霸道魏氏則虐
深華夏有晉則化成戎狄降斯以後粹駁不分帝迹皇風寂寥千載
天命聖德會昌神道變億兆之視聽復三五之規模固以幽明贊協

符瑞彪炳千年靈蔡著天地以效徵三足神鳥感陽精而表質春泉
如醴出自京師秋露凝甘遍于竹葦星光若月雲氣飛烟三農應銅
雀之鳴五緯叶珠囊之度信可以揚鑾動蹕肆覲東后玉檢金繩登
封岱岳而謙以自牧爲而不宰尙寢馬卿之書未允梁松之奏在青
蒲之上常若乘奔處黃屋之下無忘夕惕雖蒼壁黃琮事天事地南
正火正屬神之禋猶恐祀典未宏秩宗廢禮永言仁里尙想元極壽
宮靈座麋鹿徒倚華蓋芟壇風霜凋弊乃詔上開府儀同三司亳州
刺史武陵公元胄考其故迹營建祠堂皇上往因歷試總斯藩部猶
漢光司隸之所魏武兗州之地對苦相之兩城繞渦穀之三水芝田
柳路北走梁園沃野平臯東連譙國望水置塾揆景瞻星擬玄圃以
䟽基橫玉京而建宇雕楹畫拱磊砢相扶方井員淵參差交映尊容
肅穆仙衛儼而無聲神館虛閑滴瀝降而成響清心潔行之事存元
守一之傳四方輻湊千里波屬知如之敬申醮祀之禮顯仁助于

王者冥福資于黎獻。允所謂天大道大難幾者矣。若夫名言頓絕。幽
泉之路莫開。形器不陳。妙物之功難著。騰茂實。飛英聲。圖丹青。鏤金
石。不可以已。而在茲乎。歲次敦將律中。姑洗大隋馭天下之六載也。
乃詔下臣建碑作頌。其詞曰。

悠哉振古。邈矣帝先。四紀維地。八柱承天。叢生類聚。廣谷六川。至道
靈運。神功自然。五精應感。三微相繼。樹以司牧。執其象契。帝迹慚皇。
王猷謝帝。上德逾遠。淳風漸替。時乖澹泊。俗異沖和。尚賢飾智。懸法
張羅。內修樽俎。外事干戈。魚驚網密。鳥亂弓多。真人出世。星精下斗。
龍德在躬。鶴髮垂首。解紛挫銳。去薄歸厚。日角月角。天長地久。小茲
五嶽。隘此九州。逝將高蹈。超然遠遊。青牛已駕。紫氣先浮。元門洞啓。
神化潛流。賴鄉舊里。渦川遠迹。古往今來。時移世易。靈廟凋毀。祠壇
虛寂。九井生祠。雙碑碎石。惟皇受命。乃神乃聖。響發地鐘。光垂天鏡。
宇宙開朗。妖氛蕩定。耀魄同尊。參神取正。流沙蟠木。鳳穴龜林。異類

歸款萬方宅。心鴻臚納。賚王會書琛。青雲干呂薰。風入琴化致鼎平。
家興禮讓永。言柱下猶慚。太上乃建清祠。式圖靈狀。原隰爽塏。亭臯
彌望。梅梁桂棟。曲檻叢楹。煙霞舒卷。風霧淒清。仙官就位。羽客來庭。
穰穰簡簡。降福明靈。至神不測。理存繫象。大音希聲。時振高響。遐邇
讚頌。幽明資仰。敬刊金石。永播天壤。

銘語帖題文致道婉

駢體文鈔卷一

金瓶梅文卷一

...

...

...

...

...

...

駢體文鈔卷二

頌類

揚子雲趙充國頌

質厚

明靈惟宣戎有先零猖狂侵漢西疆漢命虎臣惟後將軍整我
六師是討是震既臨其域諭以威德有守矜功謂之弗克請奮其旅
於罕之羌天子命我從之鮮陽營平守節屢奏封章料敵制勝威謀
靡亢遂克西戎還師於京鬼方賓服罔有不庭昔周之宣有方有虎
詩人歌功乃列於雅在漢中興充國作武赴赴桓桓亦紹厥緒

史孝山出師頌

壯闊

薄於子雲勁于中郎

茫茫上天降祚有漢兆基開業人神攸贊五曜霄映素靈夜歎皇運
來授萬寶增煥歷紀十六天命中易西零不順東夷構逆乃命上將
授以雄戟桓桓上將實天所啓允文允武明詩說禮憲章百揆爲世
作楷昔在孟津惟師尙父素旄一麾渾一區宇蒼生更始朔風變楚

薄伐獫狁。至於太原。詩人歌之。猶歎其艱。況我將軍窮城極邊。鼓無停響。旗不蹙。塞澤滯遐荒。功銘鼎鉉。我出我師。于彼西疆。天子餞我輅車。乘黃言念。伯舅恩深。渭陽介珪。既削列壤。酬勳令我將軍啓土。上郡傳子傳孫。顯顯令問。語奇句重。下開昌黎。

但頌車騎之功而不歸美命將之人。殊失立言之體。宜昭明不之

錄也。然其詞奧美且可以備頌之別格。

車騎將軍應昭明之上德。該文武之妙姿。蹈佐歷握輔榮翼肱。聖上作主。光輝資天心。謨神明規。卓遠圖幽冥。親率戎士。巡撫疆城。勒邊御之。永設奮轡。櫓之遠徑。閔遐黎之騷狄。念荒服之不庭。乃總三選。簡虎校勒。部隊明誓。號援謀夫。於末言。察武毅於俎豆。取可杖於品象。拔所用於仄陋。料資器使。采用先務。民儀響慕。羣英影附。羌戎相率。東胡爭驚。不召而集。未令而諭。於是雷震九原。電隴高闕。余光鏡

野武旗鬻蜺衝雞鹿超黃磧輕選四縱所從莫敵馳騃疾踵蹊迹探
梗莽採懈阨斷温禺分尸逐電激私渠星流霰落名王交手稽顙請
服乃收其鋒鏃干鹵甲冑積象如邱阜陳閱滿廣野戢載連百兩散
數累萬億放獲驅拏揣城拔邑擒馘之倡九谷謠譟響聒東夷埃塵
戎域然而唱呼鬱憤未逞厥願甘平原之酣戰矜訊捷之累算何則
上將崇至仁行凱易宏濃恩降温澤同庖廚之珍饌汾裂室之織帛
勞不御輿寒不施釋行無偏勤止無兼役性蒙識而愜戾順二者異
而懦夫奮遂踰涿郡跨祁連籍庭蹈就疆獷靖填麟幽山趨凶河臨
安候軼焉居與虞衍顧衛霍之遺迹賊伊秩之所邈師橫驚而庶御
士怫悞以爭先回萬里而風騰劉殘寇於沂垠糧不賦而師贍役不
重而備軍行戎醜以禮教斡鴻校而昭仁文武炳其竝隆威德兼而
兩信清乾鈞之攸冒拓畿略之所順橐弓鏃而戢戈回雙麾以東運
於是封燕然以隆高擅廣韃以宏曠銘靈陶以勒崇欽皇祇之祐貺

宣惠氣盪殘風軻泰幽嘉凝陰飛雪灑庶其雨洒淋榛枯一握興詠

脫不可句讀嘉卉始濃土膏含養四行分任於是三軍稱曰豐豐將軍克

廣德心光光神武宏昭德音超兮眇天潛眇兮與神參

摯仲洽太康頌晉書虞擢太子舍人除聞喜令時天子留 ○和雅亦

此專為平吳而作詞有限斷故不為空綺心正道吳寇初平上太康頌以美晉德 有韻致

於休上古人之資始四隩咸宅萬國同軌有漢不競喪亂靡紀畿服

外叛侯衛內圯天難既降時惟鞠凶龍戰虎爭分裂遐邦備僭岷蜀

度逆海東權乃緣間割據三江明明上帝臨下有赫乃宣皇威致天

之辟奮武遼隧罪人斯獲撫定朝鮮奄征韓貊文既應期席卷梁益

元懃委命九夷重譯邛冉哀牢是焉底績我皇之登二國既平靡適

不懷以育羣生吳乃負固放命南冥聲教未暨弗及王靈皇震其威

赫如雷霆截彼江沔荆舒以清邈矣聖皇參乾兩離陶化以正取亂

以奇耀武六旬輿徒不疲飲至數實干旄無虧洋洋四海率禮和樂

穆穆宮廟歌雍詠樂光天之下莫匪帝略窮髮反景承正受朔龍馬
騏驎風于華陽弓矢囊服干戈戢藏巖巖南金業業餘皇雄劔班朝
造舟爲梁聖明有造實代天工天地不違黎元時邕三務斯協用底
厥庸既遠其迹將明其蹤喬山惟嶽望帝之封猗歟聖帝胡不封哉

末二語如綴效封禪文而不
得其理也 末語尚不爲累

潘正叔釋奠頌

有序 ○ 理勝於辭規諷得體

味薄氣平

有典有則義兼箴誨異乎鋪張之詞

元康元年冬十二月上以皇太子富於春秋而人道之始莫先於孝
悌初命講孝經於崇政殿實應天縱生知之量微言奧義發自聖問
業終而體達至三年春閏月將有事於上庠釋奠於先師禮也越二
十四日景申侍祠者既齊輿駕次於太學太傅在前少傅在後恂恂
乎宏保訓之道宮臣畢從三率備衛濟濟乎肅翼贊之敬乃掃壇爲
殿懸幕爲宮夫子位於西序顏回侍於北墉宗伯掌禮司儀辨位二

學儒官搢紳先生之徒垂纓佩玉規行矩步者皆端委而陪於堂下
以待執事之命設樽篚於兩楹之間陳罍洗於阼階之左几筵既布
鐘懸既列我后乃躬拜俯之勤資在三之義謙光之美彌劭闕里之
教克崇穆穆焉邕邕焉真先王之徽典不刊之美業允不可替已於
是牲饋之事既終享獻之禮已畢釋元衣御春服弛齋禁反故式天
子乃命內外羣司百辟卿士蕃王三事至於學徒國子咸來觀禮我
后皆延而與之燕金石簫管之音八佾六代之舞鏗鏘闐闐般辟俛
仰可以激神滌欲移風易俗者罔不畢奏抑淫哇屏鄭衛遠佞邪釋
巧辯是日也人無愚智路無遠邇離鄉越國扶老攜幼不期而俱萃
皆延頸以視傾耳以聽希道慕業洗心革志想洙泗之風歌來蘇之
惠然後知居室之善著應乎千里之外不言之化洋溢於九有之內
於熙乎若典固皇代之壯觀萬載之一會也尼昔忝禮宮嘗聞俎豆
今廁末列親覩盛美穢瀆徽猷沐浴芳潤不知手舞口詠竊作頌一

篇義近辭陋不足測聖德之形容光聖明之遐度其辭曰

二元迭運五德代徽黃精既亢素靈乃暉有皇承天造我晉畿祚以大寶登以龍飛宣基誕命景熙遐緒三分自文受終惟武席卷要蠻蕩定荒阻道濟羣生化流率土後帝承式丕隆曾構奄有萬方光宅宇宙篤生上嗣繼期挺秀聖敬日躋濬哲閱茂留精儒術敦閱古訓遵道讓齒降心下問鋪以金聲光以玉潤如日之升如乾之運乃延台保乃命學臣聖容穆穆侍講閭閻抽演微言啓發道真探幽窮蹟溫故知新講業既終精義既研崇聖重師卜日告奠陳其三牢引其四縣既戒既式乃盥乃薦恂恂孔聖百王攸希亶亶顏生好學無違曰皇儲后體神合機兆吉先見知來洞微濟濟二宮藹藹庶寮俊乂鱗萃髦士盈朝如彼和肆莫匪瓊瑤如彼儀鳳樂我雲韶瓊瑤誰剖四門洞開雲韶奚樂神人允諧蟬冕耀庭細佩振階德以謙光仁以恩懷我酒惟清我肴惟馨舞以六代歌以九成莘莘胄子祁祁學生

洗心自百觀國之榮學猶時苗。化若偃草博我以文宏我以道萬邦
蟬蛻矧乃俊造鑽蚌瑩珠。剖石摘藻絲匪元黃水罔方圓引之斯流
染之斯鮮若金受範若埴在甄上好如雲下效如川昔在周興王化
之始曰文曰武時惟世子今我皇儲濟聖通理緝熙重光於穆不已
於穆伊何思文哲后媚茲一人實副元首孝洽家邦光照九有純嘏
自晉永世昌阜微微下臣過充近侍猥躡風雲鸞龍是廁身藻芳流
目玩盛事竭誠作頌祗詠聖志

鮑明遠河清頌

○辟灌之功光輝斯發
序亦有頓挫節族未可與簡文並論
開張工健無一間冗之句

大抵華腴害骨然明遠采壯簡文思清固一時之傑也

臣聞善談天者必徵象於人工言古者先考績於今鴻犧以降遐哉
邈乎鏤山岳雕篆素昭德垂勳可謂多矣而史編唐堯之功載格于
上下樂登文王之操稱於昭于天素狐元玉聿彰符命朴牛文蠙爰
定祥歷魚鳥動色禾雉興讓皆物不盈皆而美溢金石頌聲為之而

寢詩人于是不作庸非惑與自我皇宋之承天命也仰符龍木之精
俯協龜水之靈君圖帝寶粲爛瑰英固業光曩代事華前德矣聖上
天飛踐極迄茲二十四載道化周流元澤汪濊地平天成上下含熙
文同軌通表裏禔福耀德中區黎庶知讓觀英遐表夷貉懷惠秩禮
恤勤散露臺之金振民舒國傾御邸之粟約違迫脅奢去甚泰燕無
留飲畋不槃樂物色異人優游鯁直顯靡失心幽無怨魄精照日月
事洞天情故不勞仗斧之使號令不肅而自嚴無辱鳳舉之事靈怪
不召而自彰萬里神行飈塵不起農商野廬邊城偃柝冀馬南金填
委內府馴象栖爵充羅外苑阿紈纂組之撓衣覆宗國魚鹽杞梓之
利傍贍荒遐士民殷富繁溢五陵宮宇宏麗崇冠三川閭閻有盈歌
吹無絕朱輪疊轍華冕重肩豈徒世無窮人民獲休息朝呼韓罷酤
鐵而已哉是以嘉祥累仍福應尤盛青丘之狐丹穴之鳥栖阿閣遊
禁園金芝九莖木禾六秀銅池發膏畝腴宜以謁薦郊廟和協律呂

烟霏霧集不可勝紀。然而聖上猶夙興昧旦。若有望而未至。閱規遠圖。如有追而莫及。神明之貺推而弗居也。是以琬碑鏤檢。盛典蕪而不治。朝神省方。大化抑而未許。崇文協力之士。蘊儻頌於外。坐朝陪宴之臣。懷揄揚于內。三靈佇睠。九壤注心。既有日矣。歲宮乾維。月纏蒼陸。長河巨濟。異源同清。澄波萬壑。潔瀾千古。斯誠曠世偉觀。昭啓皇明者也。語曰。影從表瑞。從德此其效焉。宣尼稱鳳鳥不至。河不出圖。傳曰。俟河之清。人壽幾何。皆傷其不可見也。然則古人所不見者。今殫見之矣。孟軻曰。千載一聖。是旦暮也。豈不信哉。夫四皇六帝。樹聲長世。大寶也。澤浸羣生。國富刑清。鴻德也。制禮裁樂。惇風裁俗。文教也。殊華逋羯。束頽象闕。武功也。鳴禽躍魚。滌穢河渠。至祥也。大寶鴻德。文教武功。其崇如此。幽明協贊。民祇與能。厥應如彼。惟天爲大。堯實則之。皇哉。唐哉。疇與爲讓。抑又聞之。勢之所覃者。淺則美之所傳者。近道之所感者。深則慶之所流者。遠是以豐功。躋命潤色。滕策

盛德形容藻被歌頌察之上代則奚斯吉甫之徒鳴玉鸞於前視之
中古則相如王褒之屬施金羈于後絕景揚光清埃繼路班固稱漢
成之世奏御者千有餘篇文章之盛與三代同風由是言之斯迺臣
子舊職國家通義不可輟也臣雖不敏寧不勉乎乃作頌曰

窺刊崩石掇逸殘竹巢風寂寥羲埃綿邈鉅生大年瞻學淵聞肇繡
成景粉績顓軒徒翫井科未覩天河亘古通今明鮮晦多千齡一見
書史登歌旋我皇駕揆景方塗凌周躡殷蹶唐轢虞如彼七緯累壁
重珠高祖撥亂首物定靈更開天地再鑄羣生虎御三傑龍步八垓
朔南暨教海北騰聲淪深格高浹遐洞冥龜鼎遷宋玄圭告成大明
方徽鴻光中微聖命誰堪皇曆攸歸謀從筮協神與民推黃旗西映
紫蓋東輝納瑞螭玉升政衡機金輪豹飾珠冕龍衣正位北辰垂拱
南面天下何思日用罔倦復禮歸仁觀恆通變一物有違戚言毀膳
菲躬簡法厚下安宅謙德彌光損道滋益孝崇饗祀勤隆耕籍饉酌

秋羊封瑾春骼。嬰毫兼梁。鰥孤重帛。體由學染。俗以教遷。禮導刑清。
樂鬯風宣。分衢讓齒。折訟推田。野旌伏彥。朝賞登賢。儒訓優柔。武節
森鷲。文憲精宏。戎容犀利。樞鈐明審。程護周備。吏礪平端。民羞幸覲。
桴鼓凝埃。烽驛垂轡。銷我長劔。歸爲農器。閩外水鄉。鄣表炎國。隴首
西南。渤尾東北。艷艷嶺丹。渾渾泉黑。移琛雲棧。轉隼叩焚。狼歌薦功。
烏譚陳德。治博化光。民阜財盛。班白行謠。青綺高詠。雲表幽和。物章
明慶。麗植雕質。蠹行藻性。仁草晨葶。德宿宵映。海無隱飈。山有黃落。
牛羊內首。閭戶外拓。瑞木朋生。祥禽輦作。薰風蕩閨。飴露流閣。器範
神妙。劑調象勺。匪直也斯。偉慶方臻。注彼四瀆。媚比雙川。伏靈遙紀。
闕貺遐年。澄波海嶽。鏡流蒼山。泉室凝澱。水府清涓。俛瞰夷都。降眡
驪淵。朱宮潛耀。紫閣陰鮮。昔在爽德。王風不昌。迺盜迺竭。或壅或亡。
潔源濫壑。曾是未央。先民永慨。大道悠長。云何其瑞。實鍾我皇。聞諸
師說。天竦聽密。介焉如響。匪遠匪疾。矧是皇心。妙夫貞一。左右天經。

戶牖人術訐謨布簡絲言盈室歲有綿祀清豈崇日一人之慶吹萬
稟和靈根方固修源重波副睿貳哲帝體皇柯景雲蔚嶽秀星駢羅
垂光九野騰響四遐輔居鼎足槃石虎牙世匹周室基永漢家泰階
既平洪河既清大人在上區宇文明樵夫議道漁父濯纓臣照作頌
鋪德樹聲

梁簡文帝大法頌

并序○非徒平近固無取乎亢長

大法馬寶題皆不經而文之華腴不下顏鮑且裁章宅句彌近彌
平斯固後來所取法故亦不能闕焉

皇帝以湛然法身不捨本誓神力示現降應茲土龍顏日角參漏重
瞳衡表連珠文爲玉斗自納麓開基天地之德已布封唐啓跡日月
之照先明百揆之序方舜九河之導均禹尙宏事殷之禮且屈在田
之則自五昴朝飛告赤文之瑞其兩七日受綠色之符神器有歸鼎
運斯集焦門厭棄德之君縮水發白旄之陣然後受皇天之睠命當

四海之樂推。豈假祀蚩尤於沛庭。託河冰於王霸。於時鳳凰裂序。蒼赤舛度。乃選五石以補之。坤軸傾斜。積水發坼。乃緯九數而正之。陰兔兩重陽鳥二足。乃定王業。以暉之攝提。乖方孟陬失紀。乃置清臺以辨之。維冠冕於已頽。綴珩珮於既毀。自憑玉几。握天鏡履璿璣。而端拱居巖廊。而淵默於今三十有二載也。是以天德一於上。地數二於下。復朗參辰不易。日月兩曜如合璧五精如連珠。禋宗類昊。虔丘禮澤。敬行五祀。功被百神。川嶽呈祥。風煙效祉。青雲干呂。黃氣出翼。聽隄山之威鳳。製大夏之貞筠。陽管叶春雌。鍾應律上林之課。匪疏相府之占。無謬奏六英於若水。張咸池於洞庭。秉翟動和天之樂。建華宣易俗之奏。協律有颯颯之序。典樂致雍雍之節。詩書乃陳。緗縹斯備。蒲輪受伏生之誦。科斗薦魯宅之文。蒸粟殺青。玉牒石記。填委廣內。暉煥麒麟。置台命衮。法河依嶽。建職樹司。區雲祥火。高山谷與赤敞。灑迤色麗。文翬章研。織烏諫鼓。高懸芻言不棄。肺石通惋。書諤

橋板草名指佞便辟去朝獸稱觸罪茲回放黜是以龍翔鳳集河濼
海澆露下若飴泉浮如醴桂薪不斧而丹甑自熟玉臯詎率而銀甕
斯滿河光似翬樹彩成車氛氲四照暉麗五色神明磊砢徵祥布獲
金鱗鐵面貢碧罌之際航海梯山奉白環之使戴日戴斗靡不來王
太平太蒙無思不服方叔召虎之臣均罄應鼓之將秉龍虎之秘韜
握朱元之異略受脈於廟堂之上揚威於關塞之下出玉門而直指
度金城而奏策蕩雜種之殘妖匡中原之塗炭北臨地脈西出天渠
昆夷罷患夙沙自服獲犬戎之鹿縣密須之鼓藁街有受纓之虜詔
水觀受降之首四表無塵六合共貫皇德隆矣太平之風浹乎無外
矣天子內韜無生之至慧外應體乾之宏跡將欲改權教示實道遣
方便之說導化城之迷乃端宸神居吁而言曰若夫眇夢華胥怡然
姑射服齊宮於元扈想至治於汾陽輕九鼎於褰裳視萬乘如脫屣
斯蓋示至公之要道未臻於出世也至於藏金玉於川岫棄琴瑟乎

大壑卑躬菲食茨堂土階彤車非巧鹿裘靡飾斯蓋示物以儉亦未
階於出世也解網放禽穿泉掩柴起泣辜之澤行扇暘之慈推溝之
念有如不足納隍之心無忘宿寤蓋所以示物以爲仁亦未階乎出
世也紫府青丘涇山漳水敦河上之道文悅岐伯之章句甘泉啓太
一之壇嵩山置奉高之邑碣石刻羨門之誓不期作文門之歌斯蓋
止愛久齡事在諸己篤而爲論彌有未宏雖獲龍嵒之禪終墮長生
之難徒階三清之樂不祛八倒之境豈若燃智慧之炬照生死之闇
出五陰之聚升六度之舟浮衆德之海踐不生之岸於是莊嚴國界
建立道場廣行利益開闡佛事驅彼衆生同躋仁壽引茲具縛俱入
大乘九有傾心十方草靡如憑津濟咸賴歸依擘乎若朝日之開衆
華霈乎若農夫之遇膏雨功德之翼已圓智慧之門必備以爲般若
經者方等大法峻極靡際深邃無底籠萬善乎無相兆四垓而無邊
譬猶枝川派別入大海而同味衆芳雜彩到須彌而一色空空不著

如如俱會不合不散無去無來種覺可生允茲佛母羣典弗逮是號
經王乃欲震一音兩法兩示五眼引重昏昭暘紀歲元枵次星夾鍾
應乎仲春甲申在乎吉日將幸同泰大轉法輪茲寺者我皇之所建
立改大理之署成伽藍之所化鐵繩爲金沼變鐵網爲香城照神光
於熱沙起清涼於炎火千櫨截嶽百拱穹窿紅壁元梁華棖玉砌三
階齊列四注周流上玉翼而捫天飛銀楹而蔽景虹拖蜿垂承薨繞
雷蓮抽井倒冒宇臨窗彤彤寶塔旣等法華之座峨峨長表更同意
樂之國下鑿白銀之塹傍暉金薄之輒高門洞啓不因銅馬之飾寶
殿霞開無假鳳皇之瑞金輪燭日妙臨淄之地下層臺累駕邁宛委
之空飛夏宇凝霜温室含煖雕樓之內滴動而響生洞扉之裏鷓歸
而氣激幢號摩尼幡懸金縷盤徑十丈鈴圍四斛舒七寶之交枝流
八功之淨水地芝候月天華逆風法鼓夜鳴聲中聞法瓊枝日動葉
裏成音妙德陽之宮麗未央之闥故銅櫺三丈追嗤井幹玉樓十二

遙取神仙譬彼清涼之臺同符蘭臺之寺忉利照園之東帝釋天城
之北故以辛壬癸甲綿蠻霍霽吁哉其不可狀鏘鏘盱盱瓌瑋雜錯
邈乎其不可名於是璧日揚精景雲麗色薰風徐動淵露微垂後距
屯威前茆警列武較星連鴻鐘吐響運天官之法駕啓天路之威神
百靈扶持千乘雷動六虬齊軫七斗垂暉雲罕乘空勾陳翼駕超光
躡景日被天迴金蓋玉輦豹服鼉鼓纖驪沃若天馬半漢綠弓黃弩
象飾魚文伙飛案節不勞斬蛟之劍虎賁弋羽豈假鳴烏之射湛湛
奕奕麟麟赫赫出乎大通之門天子降雕輦之貴行接足之禮頂拜
金山歸依月面如聞萬歲之聲若觀六變之動於是乃披如來之衣
登獅子之座均百慮之紛總愍三請之懇懃啓真慧之深宗明度彼
之宏教二諦現空有之津二智包權實之底大乘豁其靡礙道心究
其歸涯因果之攝不運而行真俗莫求弗動斯到不以二法會乎中
道盡佛淵海入佛法藏極修妬之妙典研龍宮之秘法宣娑婆之奧

旨闡衆聖之微言正水既沾邪難自息慧日普照毒霜並消除黑闇
於四生遣無明於三界巍巍乎若彌樓之在巨海穆穆乎譬衆星之
繞圓月於時天龍八部側塞空界積衣成座散華至膝三千化穢土
之質火宅有離苦之期惡道蒙休泥犁普息說說學侶濟濟名僧皆
樂說如辯才智慧如身子踰乎青目黑齒高彼廣膝赤髭咸符寫瓶
之思竝沾染氈之施如金復冶似玉更雕聞所未聞得未曾得鬱搖
動色請益無倦百司俱列簪履相趨豐豹焜煌華綬苒弱謂舍衛之
集大林之講無以過也將令一一佛性逢了因而俱出一一佛土咸
遣二而除三比夫歌南風尙黃老臨辟雍講孔宅么麼安足而語哉
距於三月甲辰法席圓滿如來放大光明現希有事雄雄吐色珠火
非儔瞳瞳上映丹紫競發榮河恥其祥潤汾陰陋其暉影掩入殿之
紫雲奪鴻門之妙氣昔法華初唱毫照普林般若聿宣通身盡笑王
城之瑞千載更逢豈非聖主同諸佛身降茲妙相等諸佛力有若符

契焉猶秉淵默之謙虛宏懷焉之至誠爲而不宰推而勿居以百姓之心爲心非關諸己荷負無倦攝受四生皇太子臣綱視膳東廂親承大法以爲西巡東狩讚頌以興柴山望祀詠歌斯作況頂開而受露鞠躬而聞道敢述盛德之形容以爲頌曰
玉牒悠夔青史綿長道浚五勝風殊百王商丘命瑱姬水開瓊河澄待聖海謚期皇方天譬地功歸有梁垂拱南面克己巖廊權輿教義製造衣裳九華革響六樂改張儀鳳婉婉擊石鏘鏘廣修璧水洞啓膠庠輕輶徵聘旌帛搜揚蘭臺且富廣內斯藏芸香馥蘭綠字摛章文功旣被武跡斯彰題雕臆鏤舌紫支黃南街請質北闕來王飛旌集翰勒跡書狼銀車引附黑節招荒文同海截化普龍鄉西踰月窟東漸扶桑卑宮類禹解網如湯衢室納異明臺引良善旌弗卷諫鼓其鏜萬符集祉百神啓祥黑丹吐潤朱草舒芳珠懷鏡像星含喜光液池下鶴高梧集鳳赤熊日繞素雉朝翔觀玉伯友道訪西王遊經

建木巡指盛唐終非運出豈曰津梁我有無礙共向圓常玉鑾徐動
金輪曉莊紫虬翼軟綠驥騰驤虎文駐蹕龍驂啓行闌干玉馬照曜
天狼元旄映日翠鳳晞暘前飛格澤後擁陸梁風移霆掃參差焜煌
峩峩寶座郁郁名香法徒學侶塵沙堵墻慈雲吐澤法雨垂涼三密
不限四辯難量猶茲海寶譬彼山王慧流總被藥木開芒佛日出世
同遣惑霜帝釋歌詠幽祇讚揚空華競下天琴自張山含影色地入
毫光非煙繞氣陸藕開房澤普三界恩均八方巍巍堂堂爲舟爲航
伊臣稽首萬壽無疆

梁簡文帝南郊頌

有序

○題事正大故語有條理不至如大法之紕

臣聞惟天爲大聖人敬其德知幾其神至人契其道故龍官弱言之
后合揆於蒼昊鳥紀垂衣之君昭格於上帝莫不巍巍乎穆穆乎渙
汗於綠篇氛氲於丹冊者矣我梁皇帝之御天下也乘燁祇之盛曜
卽璧月之遐照等乾覆之燾養合坤載之靈長四三六五之意十堯

九舜之明名與功偕業將時並自撥亂反正伐罪弔民馮玉几握金
鏡君臨萬國於今二十有二載也緯天維理地軸移澆風於末俗反
淳正於區中化不言而先顯教不嚴而已肅流樂復雅遠符雲韶之
世墜禮還章非因忠信之薄九垓同軌四海無波儲明變照儀天作
兩三袞咸作叶化台光麴孽王風鹽梅帝載塵清世晏蒼兕無用其
武功運謚時平鸚鷺咸修其文德桃林散甲華山弋刃玉門罷候紫
塞沉鋒屠羊釣壑之士厭洗耳而襲簪佩版築藏巖之逸去燥穀而
紆珩組異人俊乂旣間出而在官世鏡河仙亦離容而廊廟蹇蹇同
於多士諤諤比乎得人五典三墨旣葳蕤於璧水九流入索亦繽紛
於石渠畫一之政萬代表於時和三章之律百姓沐於仁壽於是龍
光之地日浴之鄉紫舌黃支頭飛鼻飲自西自南無思不服款關質
子稱臣內向珠樹素禽越火枝之地銀甕叩杖踰沉羽之涘出赤野
而連翩度元沙之決濟於是嘉祥被衆瑞登金人澤馬丹甌玉雞三

角九尾四眉六足抽鋪地之九莖發端門之連理參差於郊藪布瀆於宮闕府無虛月史弗能記周稱黃鳥之旗夏有玄珪之錫無以踰此嘉祥方茲總萃道洽世昌國殷民阜鄉知舜讓邑比堯封委粟栖畝神絲被澤可謂我化若風民應如草我靜如鏡物動猶煙天子猶未明求衣日昃不勸撤膳匪躬詢輿訪道鑾旗徐動棄千里而弗乘寶瑟無虞捐百金而不服廣行四等被慈雨於枯根大闡三明驚法雷於羣夢曲成萬物去殺愛生幽弊之民與蒼雷而共悅否滯之義同谷風而開扚昆蟲得性跂蠢欣生三驅有緩前之禽九門無餒獸之藥至德之事如此太平之風如彼乃以恭肅神祇理通孝敬江左以來爽塏未闢爰命將作揆日載營三靈叶響百工咸事宛如神造儼類仙居沖秘隱嶙跨千畝於晉日閑曠麗遠吞七里於漢年五達四通廓郊彌野南瞻重嶽北眺芒嶺東臨灞滻西望舊豐紆餘委蛇丘陵起伏澎湃堯光山川異態飛梁邃宇洞爚穴懸紫殿仙宮霞騫

鳥翥霧映倒梁日光疎。斂玉桃卷葉。銀樹抽芳。百果千株。三珠八柱。
朝葉與密露共鮮。晚花與薰風俱落。露禽乍聚。望比翼之翱翔。歸飛
時宿。聞同心之夜響。故以熊熊灼灼。炫兩明而仰七曜。紛紛沐沐。承
五烟而帶三靈。圓丘閒靜。紫壇肅設。五精之場。千神之位。八堦宏麗。
四維博敞。宛若千仞狀懸流之仙館。煥如五彩同瑤山之帝壇。石牒
神昌之瑞。方臻金縷飛光之徵。永固是雕。是琢。鄙茅茨之爲儉。非珠
非玉。嗛甘泉之已奢。望昔方今。獨高千古。沿襲異等。質文斯中。於是
歲在單闕。星次訾陬。律中太簇。日惟辛卯。將有事於南郊。甸師清野。
封人墮宮。朱幕夕峙。帷宮宿設。曉漢斜陰。挈壺升漏。天子御玉輅。動
金根。八驥揚衡。雙龍翼蓋。雲罕徐迴。鳴鏡韻響。風承豹尾。日映鸞冠。
萬騎天行。千乘雷動。石鎧犀衣之士。連七萃而雲屯。珠旗日羽之兵。
亘五管而星列。鬱鬱阡阡。震震填填。充溢乎國都。彌漫於屬邑者也。
若乃迴輿降蹕。薦禮帝儀。揖太清秩。羣望被大裘。服山冕。恭蒼璧之

明祀穆靈壇之禋敬黍稷非馨明德惟馨日曜彤精天澄翠色百僚
師師九官濟濟千神叶福萬億均慶六典斯備三禮必該焚柴告成
罔不欽若翠煙升錄同河濱之瑞雲丹燎燭天若帝鄉之美氣雲門
麗舞咸池廣樂已叶九韶之曲復諧六列之奏金匏既動望蜿蟬之
遊龍玉磬徐鳴觀參差之舞鳳袿韞駕肩士女填噎接袂爲幃連裾
猶堵鼓腹擊轅行歌舞扞然後紆玉輦而謝書生登靈臺而望雲物
欽明美化跨萬古於茲日廣運愉樂表千載於當今方當巡云云之
禮啓亭亭之業封天答睠禮地徵靈南山之壽無極七百之基長固
豈不懋哉豈不盛哉菲薄微臣謬與藩服馳心休禮秣馬之願無由
徒罄編辭清風之藻多愧敢敷庸理獻頌十章其辭曰

元始道一渾德氛氳遙哉邃古負矣初分磅礴地載清朗天文大人
覩物生民樹君其一蛇軀龍準作樂垂衣皇圖炤灼帝篆蕤蕤廓寥中
代合聖與誰於爍我后命世天飛其二玄默馭辯寂照秉真就雲握曆

望日臨民謙光履德義禮稱珍車書同軌天下歸仁其三期章孔備盛

化宏道酌衢敬賓欽賢愛老變正是珍燭車非寶如海之深如日之

杲其四肅恭明神逖聽前踵配天道尊迎陽義重玄酒陶匏燔柴雲聳

跨舜論韶籠堯稱拱其五赫矣郊宮載惟靜謐肅肅禁闈陰陰仙室六

戎列野八鸞照日架殿星羅重宮霧出其六蒲萄金橘靈壽木難素奈

開暑貞檜陵寒山池壯麗階閣彤丹葉垂疊雨花落重巒其七康哉盛

德美矣世豐三辰炳耀七政永隆五方來洎四隩茲通懸繩度竿駕

鹿追風其八既敷懋化復覩瑞滋金車出野玉露霑墀紫概神草華平

瑞芝長愉汪濊永固雍熙其九照天漏洩遠肅邇睦惠靡齊民恩彌比

屋式光惇史踰斯郁郁皇哉康哉同茲景福其十

梁簡文帝馬寶頌○賦手詩心亦自韶雅

皇帝應百姓之心副四海之願復履玉衡還臨億兆天地交泰日月

貞明至理惟新隆平方始遐邇壹體中外禔福含生欣欣若耘耰之

逢夏雨懷情坎坎譬草木之值春風帝王之道超邁開闢睿聖之功
殫歷邃古軒羲不足鑿柄堯舜不足憲章至哉大哉無得而稱也五
月丁酉朔絲竹會于德陽之堂于時日進內宮星次鶉首仲夏之晷
稍極陽城之圭蕤賓之鍾初應潁川之律縉雲旦卷南風晚扇惠氣
入帷清陰周宇玉輿雲罕照日充庭羽林中權分階列校簪笏成行
貂纓在席昭天之樂金石鏗鏘報地之禮威儀肅省詔以馬寶示羣
臣太僕效官趣馬掌贊三令五申丞聯事舉八麗四圉給役相趨暉
煜金鑣陸離寶勒天地無疆之德永星致遠之功鸞眄善鳴龍儀美
稱沸毅權奇之威趨攬抑揚之態足轉驚雷眼流含燭霧噴紛霏流
沫飄洒數千爲壽豈待原蠶之禁萬里一息不藉杜衡之草王良不
能控其衡策伯樂不能辨其文機方知總轡崑岑周非吾馭張樂大
野夏有慚德豈止沉河用璧獨有綠文之稱威德在木偏受蒼龍之
名至於干將寶劍遙服晉鄭之軍蓮花烏玉騰威大海之際況乎馬

寶義實踰之方當夙沙自歸滑橋屈膝款關入塞偃武修文去病無
出師之勞充國罷議邊之略五律成珍九河如鏡臣謹按瑞應經彌
勒成佛經中阿含經覽愚經竝稱第三之馬者二千歲華子云堯漢
皆得馬者堯漢皆火德正斗南方乘德而至也豈非聖德汪濊皇風
洋溢研機洞元備禮達義是以天不愛道白馬嘶風王澤效祥朱鬣
降祉比夫圓蹄方足躑躅在郊風嘯電奔聲遨處囿五彩依樹三雀
登巢安髣髴于當今弗擬議于休應百辟卿士咸稱萬歲伊臣不佞
結慶雲霄親承詔旨預觀寶瑞手舞足蹈贊揚不足宴禮斯畢退而
作頌其辭曰

帝廣運德欽明儀郊升道形聲德爲軌仁作經璇璣正太階平割五
禮和六英開四攝行八政轉輪皇飛行聖愍含識資惠命引蒼生歸
法性菩提真般若淨七寶均萬邦寧逖惇史觀陳詩域中大唯聖期
聞元妙復孝慈解流澤隨因時刑已措績咸熙三農盛九穀滋萬祗

悅八神怡律有節曆得天景星曜慶雲連珠爲月醴爲泉民何幸值
皇年乾道應坤馬來度玉關升玉臺鏤錫煥鸞鑣迴槃雲轉堞塵開
千天駟百龍媒永伏阜掃駒駼秣瑤粟秀芳芻九夷款四表清吐胥
樂輿頌興

高伯恭北伐頌

醇質未漓 愬至王似晉人

格高而氣卑意厚而語薄時爲之也然以視齊梁繁響則此固爲
雅奏

皇矣上帝降鑒惟德眷命有魏照臨萬國禮化不融王猷允塞靜亂
以威穆民以則北虜舊隸稟政在蕃往因時否逃命北轅世襲凶軌
背忠食言招亡聚盜醜類實繁敢率犬羊圖縱猖獗乃詔訓師興戈
北伐躍馬裹糧星馳電發撲討虔劉肆陳斧鉞斧鉞暫陳馘翦厥旅
積骸填谷流血成浦元兇狐奔假息窮野爪牙旣摧腹心亦阻周之
忠厚存及行葦翼翼聖明有兼斯美澤被京觀垂此仁旨封尸塗獲

惠加生死。生死蒙惠人欣覆育理貫幽冥澤漸殊域物歸其誠神獻其福遐邇斯懷無思不服古稱善兵歷時始捷今也用師辰不及浹六軍克合萬邦以協義著春秋功銘玉牒載興頌聲播之來葉

許務本神雀頌

有序

○氣足以載之

於猥雜 語有歸宿格雖凡近尚不至

臣聞觀象則天乾元合其德觀法審地域大表其尊兩施雲行四時所以生殺川流岳立萬物於是裁成出震乘離之君紀厲司鳳之后玉錘玉斗而降金版金滕以傳並陶冶性靈含煦動植眇元珠於赤水寂明鏡乎虛堂莫不景福氤氳嘉貺龜集馳聲南董越響雲韶粵我皇帝之君臨闡大方抗太極負鳳邸據龍圖不言行焉攝提建指不肅清焉喉鈐啓閉括地復夏截海剪商就望體其尊登咸昌其會繇區浹宇遐至邇安騰實飛聲直暢傍施無體之禮威儀布政之宮無聲之樂綴兆總章之觀上庠養老躬問百年下土民心爲百姓月棲日浴熱坂寒門吹鱗沒羽之荒赤蛇青馬之裔解辯請吏削衽

承風豈止呼韓北場。頰勒狼居之岫。息慎南境近表。不耐之城。故使天弗愛道。地寧吝寶。川岳展異。幽明効靈。狎素游頰。團膏激醴。半景青赤。孳歷虧盈。足足懷仁。般般擾義。祥祐之來。若此升降之化。如彼而登封盛典。云亭佇白檢之儀。致治成功。柴燎靡玄珪之告。雖奉常定禮。武騎草文。天子抑而未行。推而不有。允恭克讓。其在斯乎。七十二君。信蔑如也。故神禽顯賁。元應特昭。白爵主鐵豸之奇。赤爵銜丹書之貴。班固神爵之頌。履武戴文。曹植嘉爵之篇。棲庭集牖。未若于飛。武帳來賀。文槐刷采。青蒲將翱。赤芻玉几。朝御取翫。軒楯之間。金門日開。兼留翬翟之鑿。終古曠世。未或前聞。福召冥徵。得之茲日。歲次上章。律諧大呂。玄枵會節。元英統時。至尊未明。求衣晨興。於含章之殿。爰有瑞爵。翱翔而下。載行載止。當辰守而徐前來。集來儀。承軒墀而顧步。夫瑞者符也。明主之休徵。雀者爵也。聖人之大寶。謹案考異。郵云軒轅有黃爵。赤頭立日。傍占云土精之應。又禮稽命徵云祭。

祀合其宜則黃爵集昔漢集泰時之殿魏下文昌之宮一見雍邱之
祠三入平東之府並旁觀迴矚事陋人微奚足稱矣抑又聞之不刳
胎剖卵則鸞鳳馴鳴不漉浸焚原則螭龍盤蜿是知陛下止殺故飛
走宅心皇慈好生而浮潛育德臣面奉綵綸垂示休祥預承嘉宴不
勝藻躍李虔僻處西土陸機少長東隅微臣慚於往賢逢時感乎曩
代輒竭庸瑣敢獻頌云

太素式肇大德資生功元不器道要無名質文鼎革沿習因成祥圖
瑞史赫赫明明天保定於鑠我君武義乃武文教惟文橫塞宇宙
旁凝射汾軒物重造姚風再薰煥發王策昭彰帝道御地七神飛天
五老山祗吐祕河靈孕寶黑羽升壇青鱗伏阜丹鳥流火白雉從風
棲阿德劭鳴岐祚隆未如神爵近賀王宮五靈何有百福攸同孔圖
獻赤荀文表白節節奇音行行瑞跡化玉黼展銜環陞戟上天之命
明神所格綏應在旃伊臣預焉永緝韋素方流管絃歌頌不足蹈舞

無宣臣拜稽首億萬斯年

薛元卿隋高祖頌

有序

○○

頗得陳古刺今之義昏虐嗣主宜乎銜

煬帝見而銜之以爲是魚藻之義然今尋其託諷之處亦殊不可

得

太始太素荒淫造化之初天皇地皇杳冥書契之外其道絕其迹遠
言談所不詣耳目所不追至于入穴登巢鶉居鷩飲不殊于羽族取
類于毛羣亦何貴于人靈何用于心識羲軒已降受暨唐虞則乾象
而施法度觀人文而化天下然後帝王之位可重聖哲之道爲尊夏
后殷周之國禹湯文武之主功濟生民聲流雅頌然陵替於三五慚
德於干戈秦居閔位任刑名爲政本漢執靈圖雜霸道而爲業當塗
興而三分峙典午末而四海亂九州封域窟穴鯨鯢之羣五都遺黎
蹴踏戎馬之足雖元行定嵩洛水運據崱函未止滄海之流詎息崑
山之燎叶千齡之日暮當萬葉之一朝者其在大隋乎粵若高祖文

皇帝誕聖降靈則赤光照室韜神晦迹則紫氣騰天龍顏日角之奇
玉理珠衡之異著在圖籙彰乎儀表而帝系靈長神基崇峻類邠岐
之累德異豐沛之勃起俯膺歷試納揆賓門位長六卿望高百辟猶
重華之爲太尉若文命之任司空蒼曆將盡率土慶沸玉弩驚天金
鉉照野奸雄挺禍據河朔而連海岱猾長縱惡杜白馬而塞成臯庸
蜀逆命憑銅梁之險鄖黃背誕引金陵之寇三川已震九鼎將飛高
祖龍躍鳳翔濡足援手應赤伏之符受玄狐之籙命百戰百勝之將
動九天九地之師平共工而殄蚩尤翦猋窳而戮鑿齒不煩二十八
將無假五十二征曾未踰時妖逆咸殄廓氛霧于區宇出黎元于塗
炭天柱傾而還正地維絕而更紐殊方稽顙識牛馬之內向樂師伏
地懼鐘石之變聲萬姓所以樂推三靈于是改卜壇場已備猶宏五
讓之心億兆難違方從四海之請光臨寶祚展禮郊丘舞六代而降
天神陳四圭而饗上帝乾坤交泰品物咸亨酌前王之令典改易徽

號因庶萌之子來移創都邑天文上當朱鳥地理下據黑龍正位辨
方揆景于日月內宮外座取法于辰象懸政教于魏闕朝羣后于明
堂除舊布新移風易俗天街之表地脉之外獯獫孔熾其來自久橫
行十萬樊噲于是失辭提步五千李陵所以陷沒周齊兩盛競結旄
頭鳩狄后于漠北未足息其侵擾傾珍藏于山東不能止其貪暴炎
靈啓祚聖皇馭寓運天策于帷展播神威于沙朔柳室擅裘之長皆
爲臣隸瀚海躡林之地盡充池苑三吳百越九江五湖地分南北天
隔內外談黃旗紫蓋之氣恃龍蟠獸據之峻恆有僭僞之君妄竊帝
王之號時經五代年移三百爰降皇情永懷大道愍彼黎獻獨爲匪
人今上利建在唐則哲居代地憑宸極天縱神武受賑出車一舉平
定于是八荒無外九服大同四海爲家萬里爲宅乃休牛散馬偃武
修文自華夏亂離絲積年代人造戰爭之具家習澆僞之風聖人之
遺訓莫存先王之舊典咸墜爰命秩宗刊定五禮申勅太史改正六

樂玉帛罇俎之儀節文乃備金石匏革之奏雅俗始分而留心政術垂神聽覽早朝晏罷廢寢忘食憂百姓之未安懼一物之失所行先王之道夜思待旦革百王之弊朝不及夕見一善事喜彰于容旨聞一愆犯歎深于在予薄賦輕徭務農重穀倉廩有紅腐之積黎萌無阻飢之慮天性宏慈聖心惻隱恩加禽獸胎卵于是獲全仁霑草木牛羊所以勿踐至于憲章重典刑名大辟申法而屈情決斷于俄頃故能彝倫攸敘上下齊肅左右絕詔諛之路縉紳無勢力之門小心翼翼敬事于天地終日乾乾誠慎于亢極陶黎萌于德化致風俗于太康公卿庶尹遐邇岳牧僉以天平地成千載之嘉會登封降禪百王之盛典宜其金泥玉檢展禮介邱飛聲騰實常爲稱首天子爲而不恃成而不居冲旨凝邈固辭弗許而雖休勿休上德不德更乃潔誠岱岳遜謝愆咎方知六十四卦謙撝之道爲尊七十二君告成之義爲小巍巍蕩蕩無得以稱焉而深誠至德感達于穹壤和氣薰風

充溢于宇宙二儀降福百靈薦祉日月星象風雲草樹之祥山川玉
石鱗介羽毛之瑞歲見月彰不可勝紀至于振古所未有圖籍所不
載目所不見耳所未聞古語稱聖人作萬物覩神靈滋百寶用此其
效矣既而遊心姑射脫屣之志已深鑄鼎荆山升天之駕遂遠凡在
黎獻共惟帝臣慕深考妣哀纏弓劍塗山幽峻無復玉帛之禮長陵
寂寞空見衣冠之遊若乃降精燦怒飛名帝錄開運握圖創業垂統
聖德也撥亂反正濟國寧人六合八紘同文共軌神功也玄酒陶匏
雲和孤竹禋祀上帝尊極配天大孝也偃伯戢戈正禮裁樂納民壽
域驅俗福林至政也張四維而臨萬寓侔三皇而並五帝豈直錙銖
周漢么麼魏晉而已雖五行之舞每陳于清廟九德之歌無絕于樂
府而元功暢洽不局于形器懿業遠大豈盡于揄揚臣輕生多幸命
偶興運趨事紫宸驅馳丹陛一辭天闕奄隔鼎湖空有攀龍之心徒
懷蓐蟻之意庶憑毫翰敢希贊述昔堙海之禽不增于大地泣河之

士非益于洪流盡其心之所存忘其力之所及輒緣斯義不覺楚然
乃作頌曰

悠哉邃古邈矣季世四海九州萬王千帝三代之後其道逾替爰逮
金行不勝其弊戎狄猾夏羣凶縱慝竊號淫名十有餘國怙威逞暴
悖禮亂德五嶽塵飛三象霧塞元精啓曆發迹幽方并吞寇僞獨擅
雄強載祀二百比祚前王江湖尚阻區域未康勾吳閩越河朔渭涘
九縣瓜分三方鼎峙狙詐不息干戈競起東夏雖平亂離瘼矣五運
叶期千年肇日赫矣高祖人靈攸贊聖德迴生神謀獨斷瘳惡彰善
夷凶靖難宗伯撰儀太史練日孤竹之管雲和之瑟展禮上元飛烟
太一珪璧朝會山川望秩占揆星景移建邦畿下憑赤壤上叶紫微
布政衢室懸法象魏帝宅天府固本崇威匈河瀚海龍荒狼望種落
陸梁時犯亭障皇威遠懾帝德遐暢稽顙歸誠稱臣內向吳越提封
斗牛星象積有年代自稱君長大風未繳長鯨漏網授鉞天人豁然

清蕩戴日戴斗太平太蒙禮教周被書軌大同復禹之跡成舜之功
禮以安上樂以移風憂勞庶績矜宥黔首三面解羅萬方引咎納民
軌物驅時仁壽神化隆平生靈熙阜虔心恭己奉天祀地協氣橫流
休徵紹至壇場望幸云亭虛位推而不居聖道彌粹齊跡姬文登發
嗣聖道類漢光傳莊寶命知來藏往元覽幽鏡鼎業靈長洪基隆盛
崆峒問道汾射窅然御辯遐逝乘雲上仙哀纏率土痛感穹元流澤
萬葉用教百年尙想叡圖永惟聖則道洽幽顯仁霑動植爰象不陳
乾坤將息微臣作頌用申罔極

唐人爲之無此靈緒

駢體文鈔卷二